

四庫全書

集部

欽定四庫全書

集部  
錢塘集卷九

詳校官庶吉士臣馬履泰

檢討臣何思鈞覆勘

總校官檢討臣何思鈞

校對官主事臣陳文樞

謄錄監生臣黃臣鵠

欽定四庫全書

錢塘集卷九

宋 韋驥 撰

謝舉主陳少卿啓

右某啓今月初九日伏聞發奏舉某堪充縣令者  
潔已而進終始或乖取人之艱古今所病矧利祿  
之兼誘則真邪之並馳廉隅易修底裏難辨仰惟  
著令尤重舉官內責公卿外憑牧守屢宜所薦無

三適之褒一失其人有連坐之玷故居要者怠於  
汲善膠榮者恬不顧卑所抑既多彼求愈巧以至  
脅肩事諂利舌獻讒或仗勢於權豪或屈身如廝  
役止期苟得安恥屑為悠悠盡然往往皆中是以  
伊優被用端直見遺辟書不及於寒門膺仕悉歸  
於華胄夫唯有志之士豈或效尤於時寧坐而窮不  
徼而貴幸焉際於知遇足以為之振明若某者不才  
陋儒勉力初宦固以操守拙於耦從獄訟盡心未嘗



自愧塵泥托迹詎敢躁圖雖知行誼之可依常懼卑微  
之難立賴居軫下少慰胸中逃責及年撫躬甚慶況於  
意念之外復冒發揚之恩旋省愚蒙併增喜懼此蓋伏  
遇知郡少卿廓精明之鑒闢中正之途報國不捐其所  
知器人不責其必備曾是疎賤亦逢挈持上叩九重之  
深使充百里之任所謂揉蠮木而薦萬乘歛微埃而增  
泰山可否未分光榮已倍金石可敗肺腑不忘然獎飾  
既優烏得議私心之感唯忠勤以報庶不貽公舉之差

過茲以還不識所措

謝舉主潘駕部啓

伏聞今月二十五日發奏舉某堪充縣令出於不虞悚  
若自失致讓莫及過情是憂竊惟名卿之建言本朝之  
剗弊在擇令之一事深遺恩於四方曩者忽為小官署  
以庸品不由保任之重詎間貪污之流累月中程指期  
得調藉展私計他無善圖陰持金錢爭市膏壤殆其施  
政適足殃民進既無光榮顯赫之資退不惜高尚清白

之舉日暮途遠情侈意奢盡力爪牙屬饜肺腑百里之  
繫彼哉何思一軀之謀靡所不至邑邑相望人人效尤  
世所共憂下幾無告理義不足覘其面法律不足誅其  
衷豈漸靡之使然由選用之非要暨茲革制莫不承休  
謂朝廷高遠不可偏評其短長則收守按臨乃宜審核  
於才實所知者俾以名進不令則咎其濫升用是有年  
號為得士幽深蒙惠凋瘵更生絃歌相聞賦役不橫若  
昔單父之子賤益昌之易于間或有之昌可勝紀脫非

挾精明之度何以副論薦之優如某者賦性近愚趨時  
寡變投耒即學彈冠應書偶塵下科獲就初仕然雖斷  
斷實無他能寧或庸庸以徼後福善可扶而必直惡可  
沮而必摧異紆夙心孰愧清識而况賢威在上公道甚  
平貫行匪勞噐訟自引天假之幸間空犴而坐曹日亡  
所營但援琴而悅德竊安閒而持已奚毀譽之在人未  
為竒功猶免俗吏罔志於化敢言容駟之高門毋枉所  
存何害折腰於五斗庶可逃責尚安望祈豈意左右汎

傳聰明誤采以充舉吏之所請備長人之員獎飾逾涯  
驚惶無地此蓋某官持衡當路推轂下僚敦易事而不  
求錄小能而必器策款段而與其進括輪囷而使之材  
故雖么微亦被振發敢不永懷方格固守朴忠誓無玷  
身義不尸祿捷徑邪至恥同躁人鑿墉益高遠鑿古語  
完平生之蘊藉遲異日之窮通萬一有為勉罄設施之  
效始終勿改仰酬顧遇之私舍茲以還不識所措

代徐簽判謝憲使啓

竊以別乘之職半刺之任贊綱紀于一郡助風化于千里其責匪易其人甚難往存辟署之法今開汲引之路自非乎朴茂之士挾幹濟之才則何足當論薦之重為擢用之漸若某者格局踈淺闇於臨事持守齟齬拙於趣時一塵科目七更州縣連蹇萬狀孤寒一節若王良之說豈能為之詭遇如韓子所謂誰肯轉之清波幸焉晚歲偶綴通籍獲從事于墨幕誠托庇于使旆不及曠敗已踰意望豈料過聽反辱茲舉荷推轂之賜雖甚可

榮懷鑿墉之懼何以自慰斯蓋某官以公忠報國以明  
恕取人凡有小善而必錄不於一夫而求備故惟庸賤  
亦被振挈敢不薄略邊幅堅固蘊藉監鮮終之戒卒至  
白首持不阿之志上承清朝庶幾保全無玷知獎過此  
以往不知所裁

謝漕使馮學士舉京官啓

右某伏聞發奏舉某堪充京官任使竊冒薦揚驚惶固  
甚仰惟驅策庸懦不勝何則朝廷高深郡縣綿邈吏役

于外官曹實繁奚事事之可稽豈銖銖之足較廉能惡  
得而上達旌勸曷緣而下通故闕寵榮之塗乃張保任  
之法使部察一部州舉一州限之常員拘以累日屢宜  
所薦雖不之褒一失其人則均而咎增峻彛範逆防偷  
邪爵祈不虛位欲無幸且天下從官數常萬千而選中  
得賢十或八九然而間有廢道尚懷穿窬僥恩而榮竊  
賞而惠頻頻儉佞之黨烈烈貴權之門諂諛浸加請託  
交至所嫉雖可用退而寘諸淵所悅雖不才鑽而出其



利是以伊優忝軒冕之賜耿介有山林之思誠窮素之  
阻艱實公平之蠱蠹非哲人得志安能汲寒峻之蹤非  
雅吏致身何以當君子之薦如某者賦性朴鈍與時迂  
疎強遺犁鋤出即祿仕然其斷斷殆無它能寧或庸庸  
以微後福有誠必盡出位必謀念幼學而壯行詎枉尋  
而直尺塵埃一命敢謂乎滯淹獄訟三年偶逃于譴責  
皆賢威之所覆在天幸以何多尚安妄圖足以自適豈  
意聰明汎采衡鑒誤收以充數於囊封請備員於京守

獎飾過越慙倍兼此蓋伏遇某官以義取人以忠報國不於一夫而求備雖有小善而必聞曾是么微亦遭振挈敢不至其弗逮勉所未完礪清節而益堅秉赤心而愈固若窮通所繫一付於大鈞唯正直不渝永酬于厚遇舍是以往罔知所裁卑情無任激切依歸之至

謝轉官啓

右某啓伏蒙恩授前件官職業空蒙冒銓衡之鈎攷寵靈槩及忝宸陛之臚傳頌伏載惟慙慙獨甚何則承平

積久從仕至多以干進為常心指養恬為異趣飾廉隅  
以文其外廣結納以援其旁悠悠簪組之間汎汎軒裳  
之列撫寸銖而稱效索日月以僥榮莫匪自謀幾何小  
補背毛腹毳夫豈能為乘集雙飛固奚足卹朝端患其  
若是選法與之更新保任則減夫常員課最則增于舊  
矩欲薦揚之實必俟考盈防請託之深唯容外舉豈將  
阨汲引之路蓋以待英豪之來苟非超卓之倫曷副延  
求之意如某者學靡該洽器非優長以罷軟而棄農耕

由窶貧而圖祿官一竊科第久甘塵泥雖知利達而有  
為自分顛蒙之難彊遠騁逐之可惡固操修於必安發  
施無不篤於誠思慮未嘗踰其位治囚江左猶多好犯  
之民作邑淞東或有敢欺之俗鑿古人而良歎叨秩廩  
以宜羞奚虞冗散之資亦被褒陞之命孰謂自致敢忘  
所緣此蓋伏遇集賢僕射相公堅贊國之懷竭代天之  
力闢公道而形四海端直表而正百官雖澄濫進之源  
常嫉蔽賢之敝欲裨巨浸不棄涓流之微欲助大明罔

遺燭火之細遂使迂疎之品亦由論薦而遷敢不充擴  
良能養完舊蘊務端平而中立舍矯揉以外求赤心有  
不徇之忠白首無可移之節仰疇覆載之惠次答鈞陶  
之私寘茲而言曷識所向卑情無任激切知歸之至

謝太守啓

右某啓此者拜命楓宸竊玷王言之綍補官萍邑獲依  
刺史之天載省載維且懼且懼一昨濫膺章奏偶合銓  
衡繇江左之決曹徙淞東之領縣雖持已有常道而治

民無長才第遵法令之程勉襲循良之迹然而風力所  
被未虛訟筒勸導所加猶有曠土犴或留于宿繫犬未  
免于夜鳴徒疊疊以竭精乏班班之顯效閱歷萬變因  
循數年止圖逃責以罷歸不意當途之論薦揣非功而  
見錄慙以次而被遷籍名初隸于省中出宰合從于湖  
外念安輿之侍奉患遠道之間關據陳此心請易茲地  
其如生齒繁夥封疆濶疎久傳難治之聲固有先憂之  
勢借令挾利器之用烏可忽盤根之堅况欲遠希古人

擺去俗狀上承朝家撫育之意下徇田里便安之情興  
言及斯為理非易仰有所賴庶幾自平恭以知郡郎中  
德性素高術學尤粹識通世務望壓仕途輟計庭經畫  
之謀即藩壤承宣之任發恩威而兼濟端錯舉而至公  
千里安甦悉紓懷而樂處一時屬吏唯拱手而貫行則  
某也奚憚剗煩良甘託質豈須矯激易于無腰笏之勞  
敢事優游巫馬守戴星之分方叙欵誠之獻過蒙教誨  
之貽指期可伏於門闌嚮誼難窮於筆舌下情無任激

金少已月  
卷九  
切知歸之至

謝劉兵部啓

右某啓伏蒙恩授前件官竊叨陞擢實冒薦揚自知固  
明塞責何以拜命之始積憂已深何則百里之疆萬室  
之衆思數所致戚休所緣教令擇後先利害審因革孤  
惛困疾之必濟強梗侵陵之必鋤均賦役之重輕訓農  
桑之勤怠皆政本之尤急在思兼而果為事或難常不  
欲苟作而徼譽敝有得易不當姑息而殃民上奉朝廷



愛育之深下成閭黨便安之望故典邑之官則小而字  
人之職非輕况貫行于盛時剡次補于舊制率由保任  
之法宜得精明之材儻匪其人曷充茲選如某者聞於  
大體實無他能學尚柅於逢原識未宏于經遠枉尋直  
尺違俗得譏吐剛茹柔與古共耻向占名于任版獲試  
采于江城礪愚以勤補拙唯正自謂赤心之足恃詎疑  
白璧之難為業踈誠病于技窮謀過返慚于智小方免  
愆之未暇俄被舉于不虞卒令叢微玷此銓品此盖伏

遇知府兵部逢時補報履道信誠不私所薦而害人不  
舍所知而蔽上持衡顯位毫隱莫容推轂下僚跡單罔  
間曾是空頑之器亦遭汲引之恩敢不固于朴忠勉所  
充擴彈琴聽治雖微于賤之優閒腰笏衛民敢效易于  
之激切庶幾有立之漸靡及無聞之嗟上答生成次酬  
驅策寔是而語烏知其他

代章郎中謝兩府啓

拜命中宸榮歡固切領麾遠郡愧懼方深念委寄之匪

輕揣才猷而莫稱竊起循墻之戒且虞假器之譏雖朝廷任人容有不備然師帥宣化得無自難恭惟某官柱石邦家鈞衡海寓贊周道之如底輔堯仁之若天未嘗不為官擇人思所以與世興利耻一物之遺澤遠過伊臯欲伊人之長民皆如龔魯如某者濫膺掄選實積兢惶敢不固守朴忠厲精術學勉圖治狀豈甘碌碌之無竒微補昌時願效涓涓之不止仰答生成之賜次疇陶鑄之私舍茲以還不識所措

謝運使王學士啓

將迎既失竊羞拘滯之資苛細不誅尚賴寬明之度帳  
為謀之甚拙於自咎以宜多何則邑落幽深使麾崇重  
非按視之繇此曷瞻望之有階固當俯伏道旁奉承鈴  
下露悃忱之萬一聽教戒之丁寧豈惟盡事上之儀亦  
足悟臨民之術而某智忘適變性泥執方念積粟于囷  
倉慮繫囚於囹圄畏空城之無守計峻路之且遙奔馳  
敢憚于暮歸參候欲圖于晨往豈意供帳都徹脂車亟

行入境不呵耕耘之無止解鞍唯頃頃伺之難量是以  
策蹇莫前拜塵靡及憂霑汗背愧發頓顏雖聞飛蓋之  
遼猶懼半途而畫回轡固慚於違禮越疆返懼于冒威  
進退冰淵腹心芒刺彈琴聽治耻非于賤之優閒負弩  
先驅獨遠相如之風采其為不幸烏可勝言恭惟運使  
學士道涉本原器含宏厚吏不由于末節假人微察于  
至誠故此叢微之體得逃懈緩之譴仰戴鉅德實將終  
身某下情無任惶懼之至

上劉工部啓

某啓伏審涓辰已諧禮上千里之內民物喜躍迺及旁郡莫不延頸企踵以便教命之行仁人之風其盛如此恭惟某官德業宏遠志勇兼善累更重寄所至稱首爵賞之及未嘗不避化天下之貪激天下之懦遠比古人夫復何讓頃者領荆楚之漕乘歲歉之後迫于經費假易供調異紓民力卒挂吏議左授此邦在公何愧邦之士庶聞上拜命知公決無愠色而皆望賜于公是公之

德誼見信于四方深矣則公之自任宜如何其重且睦  
雖偏封數得賢守前有范趙以言謫居公今繼之焯燄  
相屬豈天獨私于是哉某不才之人嚮備奔走受公之  
恩殆為私頌公之美不為誦今茲效官幸在近境雖獲  
偃仰山邑聽輿歌之傳不能俯伏麾旆道州人之慶伏  
祈早膺大用以充郡望卑情無任激切依歸之至謹具  
啓事陳賀

代章伯瞻謝沈舍人舉陞擢啓

右某伏聞論薦引重度越倫等自顧衰晚豈不愧荷古語有之達觀所舉如明公之達而某也被舉不既失於多愛而略其所觀乎恭惟明公發德誼之積靡兼善之量不以富貴自大以賞識汲引為己任雖古之才臣忠輔篤于拔賢進善者當不過是宜有豪傑茂美醞藉深遠副明公甄收之精當熙朝器使之重若某者何足尚哉明公曲借題品請備陞用挽而致之使出門下豈所謂先其所知而來所不知者邪退惟匪材敢不强勉耿



介之守老當益壯有為之心亦所未已庶幾異日不為  
提獎之玷寔是而言詎錫何報區區之誠實罄于此

謝郭省副啓

右某竊以朝廷清明賢傑輩出中外要職因或輕付雖  
官非宿業任不食舊而東求進用平正詳審故人各自  
效宣布風力增高太平輝映前世然猶間詔近侍參舉  
所知付之有司以備陞擢為官擇人無盛於此宜有朴  
茂瑰偉之彥宏深厚重之器達古而不跼于泥適時而

不牽于俗材猷綽然度越夷等上副鉅賢之論薦下平  
四海之公議在于某也能如是乎忽玷明公之薦仰塵  
當宁之覽旋自省度豈不恐畏此盖伏遇某官廓精明  
之鑿持剛正之度責人甚薄未嘗矜已小善不隱將以  
報國曾惟疎鄙亦冒汲引霜臺靖位夙荷于恩麻虎符  
遠守尚叨於齒記終始厚德何以負戴固當倍益素蘊  
堅完晚節更圖微效之立庶塞見知之深舍茲以往不  
識所措

謝王學士啓

伏聞發奏舉某堪充京官任使者無所取材分孤蹤之  
連蹇不求必備幸高誼之甄收仰冒薦揚竊深驚懼伏  
念某學不貫道智非適時強離耰鋤出即祿任忽忽已  
踰于一紀區區纔歷于兩官無邊幅之外修無錙銖之  
旁援獨立雖不愧直行多所違衆皆誚其迂踈心自安  
于方格敢為白璧奚憚青蠅是以門如冰寒席或塵滿  
靡圖虛譽之飾第畏素餐之尤然而賦性不靈臨事幾

閻攝調萬室黽勉三年獄訟豈能盡其情惇獨豈能周其隱薄征均役蓋國令之素明止盜去姦亦人情之常務之優優之美政徼赫赫之奇功得逃瘵曠之誅已慰勤勞之慮豈謂聰明泛采衡鑿誤收擢之塵土之間聞之朝廷之上罔稱驅策難平悖慙此蓋伏遇某官充擴至誠主張公道別羣吏之淑慝振列城之紀綱排巧宦諂諛之朋絕貴權請託之路片善可撫雖寒生不遺一惡可摧雖美官必抑但量能于器使不格物于已長故

在么微亦叨汲引敢不增修踐履固守朴忠利國惠民  
則知無不為謹身樂善則沒而後已庶幾一介之節無  
玷鉅賢之門舍茲以還曷識所措

謝憲使元郎中啓

某啓幼伏草萊辱公之顧舊矣從仕十餘年常恐碌碌  
無狀為門闌之羞耳典邑窮僻官滿垂去而公按視此  
道望見麾旆愧喜兼作甫迨朞月首被論薦是公之所  
以蓄待不謂終久碌碌而期有植立于後時也則某之

金史卷之九  
卷九  
所以自勇于善報公之德宜如何其為守局畏簡書不  
獲奔走庭下姑獻鄙言以叙荷戴之懇惟公亮其誠略  
浼瀆之罪皇恐皇恐不宣某再拜

賀章郎中移廣西察刑啓

某啓乍違麾旆傾慕深極伏承被受新命凡邦之吏民  
無不悅喜如某等輩冒德之厚其為抃躍以言相賀百  
倍吏民之情非賀此足以為公榮蓋大君子進用之漸  
宿德舊蘊施發于他日未易可量是亦足以為賀也不

識騎從今憇何所杭越計少留止赴治之程未知復過  
蘭汀否瞻仰威重不勝拳拳春深猶有寒氣途中倍乞  
自壽以慰衆望不宣某再拜

謝守倅啓

某啓智不察幾雖昏冥而可念體如慢上在微最以宜  
憂尚賴寬明得逃譴責撫懷知愧冒德無涯何則禮辨  
等衰律存統屬賤承于貴若級之在堂縣隸于州如足  
之戴首順此高卑之分自然禮義之安苟易視而不倫

或輕為而敢犯祇自取辱孰云善謀謗非難掩于能言  
悔吝因違于旋踵且不分菽麥猶知蹈此而寒心豈粗  
服典經反肯倨然而措意事出不料情當有原緣府隸  
之具文詣邑庭而請判詰其所命則曰承檄而專馳審  
其所須則曰附身而為据念舊槩之嘗及遂直書而不  
疑不度斯人輒連以上瀆聰明而已甚發威怒于必行  
亟窮怠忽之根芽將寘愆尤于繩約而某深思本末倍  
積慙慙汗竟趾而尚流魂去幹而重返憫愚衷之未達



露鄙語以自明非求文過而脫身所覬宣誠而待罪豈  
謂霽嚴以納推恕而通原心特遣其因循降指唯從于  
戒飭置孤蹤于無玷貽厚幸于不虞竊惟顛蒙何以補  
報此蓋伏遇某官開有容之度敦易事之風不由一青  
而廢人不即一夫而求備故茲下吏獲被深仁固當勉  
所未完克其不逮誓堅清白之節仰答包含之私舍茲  
而言不識所向

謝章少卿舉應手詔啓

右某啓伏蒙奏名仰應手詔鄙朴何幸獎知獨深由門下之薦揚方離選集被廷中之音旨又越等倫感恩雖志于無窮揣已固慙于非分喜畏兼集情言曷勝恭以聖人臨治之初天下久安之日丕承乎祖宗基業尤慎維持所重者邦國事為難忘因革既開讜直之路復念滯淹之材以謂得于歲舉則泛泛未精拘以官聯則規規不廣迺頒不次之命庶獲有為之賢內焉屬近視之臣外以委行臺之使毋有所隱各舉爾知不論品秩之

高卑止間貴權之族裔槩取實效壹歸至公奉茲詔者  
其責非輕與是舉者其人豈易宜收士類之翹傑以副  
上心之採求如某者器業不優操修未粹徒蓄敢行之  
志殊無應變之資凡所存誠固也效古人之守及夫臨  
事幾何非俗吏之為曩得調于銓衡獲承風于使節踈  
鈍本希於逃責聰明返誤于見知僻邑三年愧難成其  
美治薦書一上幸曲借其餘輝解官既遠于恩闕待次  
方留于里閤豈圖多愛常齒不才復推累日之勤俾預

一時之選除官芸省方抱濫遷之憂出宰萍江遽聞煩  
使之報始悞巨源之啓益銜智伯之知敢謂當然何由  
致是此盖伏遇運使少卿至明自照特立不疑報國以  
誠取人以恕有以適用雖片善而不遺果于必聞雖屢  
言而無倦故此叢微之品數叨汲引之私敢不涵養良  
心堅牢素履慕蹇蹇輸忠之跡屏區區膠祿之情誓不  
苟隨保松筠于霜雪庶幾有補助海嶽之涓塵上答生  
成次酬振挈過此以往不知所裁

上江州劉吏部啓

右某伏審解職霜臺頒條江國仰惟化治之暇保協神明之休恭以知府吏部德業粹全聲輝充溢頃輟西畿之經畫入踐烏府之崇班指佞斥邪朝端畏其風角廉貪立懦天下慕其猷為言有中而勇于必行事或偏而期于必矯素耻依違之病比形執奏之堅蹇蹇自持固守匪躬之節硤硤見抑肯興易缺之嗟甘遷謫以獨安謹承宣而愈效幸哉千里獲繫布政之優奈此輿謀猶蔚

登賢之望某尸官僻邑引領恩閱簡書有畏而進謁莫  
前麾旆且遙而馳心徒極伏望上副倚注精調寢興

謝范吉州啓

右某言念曩繇公便得遂私誠較士籍以告休伏賓陞  
而知幸纔仰誨言之益遽違德誼之高歸復拘攣日馳  
精爽貢懇方慚于稽晚貽書又拜于勤劬齋醞遠霑均  
美議晉賢之度瑞圖佳貺集珍欽漢守之良驟增敝邑  
之光愈積懦衷之感未緣叅候徒切傾依伏望上副倚

注精調寢餼云云

謝運使徐郎中啓

右某啓伏蒙發奏舉某堪充不次陞陟任使者剽繁無狀方深罷黜之虞與善不求遽冒薦揚之賜榮懼相半情誠曷勝恭惟國家緝持紀綱振補滯敝事有可革不牽襲故而重于更張才有可庸不患處卑而難于驟進故獻議多繇于草野高蹈或作于丘樊正賢者引類之秋迺君子得時之會然非抱竒瑋之器曷足膺振拔之

公況當精識之昭昭豈容誤采于泛泛如某者所鍾不粹以學自資蚤脫犁鋤之勞即從闕杵之守蓋為貧而無愧奚竊祿之足譏知理義有以悅心而思慮未嘗出位荏苒既踰于一紀因循方歷于兩官詎能枉道以求伸不謂憫窮之見取頃繇汲引槩預遷除安輿念遠侍之難劇邑遂易方之請材非虞詡當盤錯而可憂業謝言游在絃歌而安用自據案而臨治每窮辰而疚懷平賦役于錙銖之間辨情偽于毫末之始知其疾苦必也



力行有所承宣敢或自緩然而智淺謀遠心專術踈雖  
欲慕古人之為幾何非俗吏之事豈意聰明過聽獎飾  
濫加曲形外舉之章援進下僚之迹退自揆省曷為夤  
緣此蓋伏遇某官報國以忠取人以恕歷列城而恩威  
兼濟廓至鑿而賢否坐分不忽涓埃之微不遺飛集之  
寡皆籠羅揆恰欲盡致于有為故樸鈍迂踈亦見推于  
不次某敢不益完素節愈勵赤心有利于邦縱捐軀而  
何愛非義而貴誓沒齒而不居仰答生成之私次酬知

遇之厚實此而語莫知所從

謝運判夏屯田啓

右某啓伏蒙奏舉某堪充大藩通判任使者竊依鉅庀  
逃吏責以踰年輒玷誤知冒薦書于前日幸出不虞之  
甚憂深克荷之難伏以國家用人之常著令所守凡預  
遷陞之次率沿保任而居非示之以疑貳之端蓋施之  
為誘掖之道使輕淺易搖者把持而自固罷軟不力者  
強勉以自支豈寸寸之可量在滔滔而有間加澤雖繇

于正宁挈權多委于外臺當高賢公舉之明必衆人皆  
可之善苟不及是奚宜致哉如某者挺身草萊從事經  
史學第求古器非適時心惡巧而近愚性恥隨而幾僻  
為貧而仕視闕柝而不卑由義以安遠風波于莫測一  
塵士籍之末兩效官曹之微乏美最之足稱唯孤衷之  
自信僅從汲引得預改除安輿念遠侍之艱劇邑遂易  
方之請其如民物繁夥封疆曼遙知禮誼者蓋稀謹教  
導而難入當茲錯節愧無利刃之資必也得情期偏鳴

經之樂閱歲時而將久緝條理而粗成未彰曠職之尤  
已慰善謀之計豈謂聰明過察賞識泛收取于列城之  
窮擢于羣彥之後曲形奏牘之重俾貳藩條之雄退省  
不勝靜思所自此蓋伏遇某官至誠任己直道贊邦持  
衡當路而軒輊不偏推轂下僚而米求不備曾是迂踈  
之品亦叨挽進之私某敢不激厲遠存養完舊蘊堅其  
固守之節充以壯行之心進則竭忠唯沒身而後已泰  
于從欲誓得志而弗為上答生成次酬獎遇過此以往

詎知所裁

上連使徐郎中啓

右某啓伸於知己士心之常不如乘時古語所載稽義  
命而無愧審情言而可形況在高明之前必寬浼瀆之  
咎某生而甚朴學以自持一塵下科久歷微官雖無應  
變之智獨保徇公之誠未嘗違道以求從豈或屈身而  
希進職思所守固防濫竊之譏義在必行敢迹因循之  
病徒欲展區區之志未能離碌碌之間幸此效官深于

冒庇方慚盤錯之困返被薦揚之光揆力不勝銜恩已厚尚安懇款之獻蓋樂門闢之歸恭惟某官敦易事之風廓有容之度察其非狂狷之請使之安附託之榮則願竭愚衷異毫釐之可撫仰承賢畫庶萬一之有裨云云

上虔州劉都官啓

右某啓念嚮慕德名方抱積年之恨黃緣吏幹獲伸一拜之勤幸款奉于霽威復飫承于餘論奔走侯封之內

往還賓履之間更月律以再之勤館人者數矣及乘舟  
楫之便徒想旌麾之光銜禮遇而固深貢誠音而何緩  
敢恃高明之炤必原倥偬之情伏惟鎮撫多餘福休並  
集恭以某官吾儒懿範當世偉材術學素明聲猷相副  
興利除害心古人之心履義居仁樂君子之樂比輟外  
臺之畫暫臨劇郡之雄雖遠民慰來暮之懷然輿論有  
淹賢之嘆佇聞大任之降以愜至公之評曾是么微尤  
增祝頌伏望上為邦社精調寢興

謝淮漕蔣金部舉陞擢啓

右某啓伏審發奏舉某堪充陞擢任使者風力不彊方  
虞曠職聰明誤采返玷薦書荷恩則深度已唯愧且朝  
廷嚴督責之法郡邑有承宣之難非精識疏通不足任  
今日之事非周才決洽不足赴一時之功而某也學粗  
知方智非應變俛薄官因循歷年盤錯屢當孰稱利  
器雪霜不改自保孤筠悉心縣道之繁栖迹海壖之陋  
止待譴斥敢希獎知此蓋伏遇某官履道坦夷取人汎



博才能必紀片善不遺故在蕞微之蹤亦叨汲引之賜  
敢不就志謀遠忘軀徇公終保自知之誠仰酬公舉之  
德下情無任激切依歸之至

謝轉太常博士啓

右某啓今月二十三日伏奉勅告授前件官者逢時從  
仕宣力無聞累日序遷拜恩可愧偃僂雖知于益戒輪  
困終病于非材靜以返思胡然冒進此盖伏遇某官至  
誠與物正誼接人凡其托軒輊之間莫不被含容之賜

故使承流之末既沿攷績而陞敢不淬激于中持循所  
學願竭壯行之志庶無幸位之羞上答天仁次酬賢造  
下情無任激切知歸之至

謝監司舉陞陟啓

右某伏蒙發奏舉某堪充陞黜任使效官無狀幸吏責  
之偶逃冒庇已深况薦書之復玷出于不度感在無窮  
何則巨江以南劇縣相半曾是敝境且鄰大湖戶口櫛  
比而艱于治生風俗輕悍而狃于冒法識禮義者蓋寡

賊善良而固多頗為難官足號巖邑向患侍親于遠遂  
甘易地而來既至之初悉心已治開之以孝弟之道示  
之以廉耻之端斥惰游之害農去邪蠹之妨政爭訟求  
決必也冤枉直真偽之原賦役有加必也均重輕勞逸  
之勢力可為而必極慮可索而必殫問關三年僴俛一  
意乏顯績之足道偶編氓之粗安皆高賢涵覆之私非  
不肖剝裁之致豈意聰明過采衡鑿誤收矜其不備之  
資期以有成之器曲加賁飾俾預遷陞自惟歛然何以

至此茲蓋伏遇某官誠心無撓德量有容報國以忠一  
言不苟蔽賢是嫉片善不遺故在孤微之蹤亦叨汲引  
之賜敢不益堅素守愈激懦衷見義必行羞于膠祿在  
邦有補誓不顧軀庶冀踐履之完無辱獎知之重舍茲  
以往曷識其他

得替謝監司啓

右某今月十一日依准先奉勅命已交割縣事與替人  
管勾訖治繁既久逃責固多受代已歸荷恩有自瞻門

闢而雖遠銘肺腑以彌深何則自江以西為邑非易況此巖險介于湖湘占版籍者四萬餘食境壤者十五六舉皆頑鈍而難化復多輕悍以忘生詐偽衆而艱于辨真抵冒煩而勞于扶弱足為盤錯之地誠費剝裁之功故官者類不欲來而來者鮮以善去某材資朴野術學迂踈始因遠侍之難遂有易方之請然而據案臨事常懼不勝遵法衛民自疑無效倏忽三年之外間關萬變之來賦役均平幸朝廷良法之降盜賊衰止藉天地豐

年之祥間或承檄奔馳越疆營幹雖獄事絳非辜之劫而縣道免不職之愆知非所能寔有攸賴此蓋伏遇某官至明兼照巨量廣包馭吏固有其方責人不取其備遂使孤微之迹不形瘵曠之尤誓罄真心仰酬厚德下情無任激切依歸之至

謝提刑毛職方啓

右某啓伏蒙削奏舉以陞陟者逃責歸罷已繫鉅庇發函論薦復玷誤知感懼交深情言兼切一昨官巖邑試

刀盤根行所學而自持幸吾民之見幸裁決庶空于投  
鋤勤渠敢後于戴星皦皦誠心雖欲慕古人之事區區  
治狀幾何非俗吏之為固微異績之可書常慮非聲之  
或過向鄰名部久冒德輝屢蒙善誨之貽獲免瘵官之  
失何天幸之加厚會使麾之改行首臨敝境之窮獨霽  
嚴威之重察大體而不誅其細假優禮而少與之權百  
里增榮二天均况及茲受代莫匪銜恩貢謝懇以方馳  
聞薦書之遽上出于踰分倍以再恩此盖伏遇提刑職

方廣聰明之資秉中正之誼取人以恕報國以忠持衡當路而軒輊不偏推轂下僚而米求不備故在孤微之迹亦叨汲引之私敢不勉激懦衷益宏素節願違碌碌趣直道以安行請效涓涓滋明時而潛補庶以始終之守不為獎遇之羞舍斯以還不識所措下情無任激切依歸之至

謝蹇學士張學士舉陞陟啓

右某頃玷薦書獲序陞而固幸久稽謝款由密啓而莫



知感作並深誠情兼至伏念某智非應變材不識時強  
違丘樊出即祿仕謂事功之可勉則知無不為謂術學  
之可施則篤于自信凡五遷于職局唯壹意于朴忠宣  
勤徒罄于區區抗迹未離于碌碌一昨拘繫海邑向望  
使麾竊冒德以雖多悵拜塵而罔及豈意聰明過采衡  
鑒誤收潛紆汲引之恩遠及空疎之質此蓋伏遇運使  
學士取人以恕報國以忠不遺寸長必致之於有用不問  
小善必報之于勿疑故在孤蹤亦叨公舉敢不養完素

守勉勵壯行庶幾正直之風仰酬知遇之重舍茲以往  
詎識所裁

問候僕射王相公啓

右某啓歛塵迹之微累跼淮海望台光之重久闊門闕  
豈無犬馬之情第恨雲泥之隔故尺牘不通于左右寸  
誠不達于高明在朝夕以拳拳歷歲時而苒苒恭惟僕  
射相公材尊命世功極代天智變若神卷舒由道以稷  
禹自任于己非堯舜不陳于君發聖經之義而學者知

原贊皇極之猷而人心歸厚事可圖而必立何憚艱難  
政可革而必更孰為沿襲獨著龜于機務絕蒂芥于浮  
言追還治古之風增重熙朝之業績既成于久大身遂  
退于優游印綬乞還即舊邦而偃息節麾懇避領仙觀  
之清閒雖鉅賢進退之心固安于義然四海瞻依之素  
未足于情某自省顛蒙嘗陶教育悵靡蹤于末宦阻伏  
謁于高牙願聽衮衣之歸早充輿誦之欲伏望上為宗  
社精調寢興

謝發運吳兵部啓

伏蒙論薦舉某堪充臺閣清要任使者弱羽卑栖物情所分高材巨用人事之宜苟違一間而求是拒大鈞之勢在志士乃能安于命惟達賢有以取諸人故拔淹振滯則有時而為噓枯救涸則盡力而已要之不失于清議然後可符于至公若公之舉也豈所宜輕如某之愚也何足以稱此蓋伏遇發運兵部深仁汎愛厚德有容采其善而不求其完擇以心而不格以已曾是冥行之

迹亦塵密啓之言敢不充擴至誠養全舊學勉其得為而不牽于習俗高其所向而無愧于古人庶幾自信之誠仰答見知之重舍茲以往罔識其他

海門得替謝啓

右某啓今月三十日准勅受代訖勤勞海邑營職無聞在再天時終更遽及獲逃官謗壹賴公庥方其朝家法美而令嚴縣道勢輕而責重必欲奉行而底于理莫非精識而竭其情迺能宣上之德澤而不為空文始可議

民之戚休而以安蔀屋凡此皆其難務非才何以曲全  
靜維免戾之繇固有歸仁之地茲蓋伏遇某官輔時以  
道待物以誠聲振列城之風激揚羣吏之治不銖銖而  
求脩嘗皦皦而有容故于朴拙之蹤亦逴迂踈之責感  
戴厚德鏤銘深衷無任縷縷懇到之切

代楊侍郎上文太師啓

右某伏審光膺宸命榮劇帝師顯機政之大謨主經邦  
之至論四方傳播壹意抒歡恭惟某官命世鉅材濟時

重器出將入相久贊無窮之基尊主庇民允成可大之  
業避榮即退閒之樂趨召副淵嘿之思戚休常係于生  
靈出處可議于宇宙位冠三公之長禮優五日之朝四  
夷方懾其威聲百辟再瞻其儀表太公之佐周室止當  
應卜之初傳說之相商朝亦在宅憂之後豈若詔聘加  
于得謝之際謀猷納于弗言之時誠憂古之所無乃昌  
辰之攸賴壯龜鼎尊安之勢慰寰瀛鼓舞之情某忝領  
州麾遽之淮甸望台階之煜煜展慶無緣貢愚款之區

區宣心莫及伏祈上為邦社精調寢興

謝楊侍郎

右某啓頃蒙論薦恩蓋出于不虞久情剝聞罪難逃于  
弗敏贖聽一袂媿汗交流感衷則新冒德惟舊竊以高  
位以蔽賢為患志士以自媒為羞然而人才固豈易知  
已知亦不易遇惟疏達公明之識乃克有知而不疑惟  
敏廉勁正之資乃能有遇而無負若某也間關末宦樸  
樾小材聲迹不足以動人知謀不足以適用徒潔身而



奚補姑苟祿以未歸方其倖貳于淮城幸矣棲遲于使  
部第拘側僻未仰輝光遽承趨節以還空起戀軒之望  
不圖誤愛嘗玷飛章及逋責于終更即罹憂于永慕視  
息延于殆絕衣冠復于更生一來京師兩易歲序馳騁  
敢思于千里回翔僅占于一枚雖漫刺之獲投尚霽威  
之未覲膺門可貴方思再拜之榮濤啓或傳始悟積年  
之賜此蓋伏遇戶部侍郎取人以道照物以誠是非不  
謬于毫釐軒輊不差于蒂芥采察有要何嘗直尺而枉

尋慰薦所加不俟聽言而觀貌此不肖銘心之感宜倍  
常情在鉅賢援手之私若為圖報誓永堅于操守庶毋  
辱于獎知卑情無任激切依歸之至

代人謝及第

淡榜載揚竊塵精選渙恩就擢深愧非材宜黜而收以  
榮為懼伏以國家養完士類辟雍尊建師儒恢張三舍  
之規延聚四方之雋崇淵微詣理之學斥破碎不經之  
文有升補以激其能有考察以砥其怠欲觀其久則歲

月以限必懲其甚則殿罰以終蓋誘之掖之使成君子之器則或出或處盡冒聖人之風宜其詔舉一傳計借四集獨此羣彥取先萬邦多造道自得之倫絕異端斯害之黨曳袍即席氣凌風雲沙筆吐竒妙入神化極天人之精稜窮治亂之本源莫非瑰璋之資足副英雄之穀儻不然者何其與焉豈銖銖之稱而不免于差豈一一之歛而或容其濫如某也降才非穎厲志自強勉勉弓冶之傳拳拳詩禮之訓兩繇鄉舉一預薦書雖得失

不足以動心而智慧莫諧于乘勢因治任于千里幸占籍于上庠偃然樂育之間期于深造而已年彌加而意彌篤學愈久而業愈踈適偶設科之求忘圖發策之決傷弓勸翮易生曲木之驚再戰疲兵徒有焚舟之誓與諸生而並進角一日之所長潛分罷歸敢希偶中致此策名之及詎無援已之緣此蓋伏遇某官開發聖經主張吾道從容不倦之誨裨益有為之時變愚而明化駁而粹故使寡聞之迹亦叨賜第之光敢不勉所未能至

其不逮用擴良心之蘊永堅大節之端仰答生成次酬  
教育寘此而語固知所裁

謝呂少監大夫舉陞陟啓

右某啓勾稽竊祿方托餘庥剡奏推材遽先鄙迹出于  
不度感也甚深何則古人重傾蓋之知志士甘抱關之  
守唯得之有命守雖賤而必安唯取之以誠知雖新而  
弗舍故窮不淪于媒已達不陷于蔽賢邈哉此風存亦  
無幾如某者養心未至涉道不精仕由為貧才豈適用

奮力鉅創之後勉從列職之卑棲遲一枝荏苒三歲曷  
期內府之貳忽偶高賢之臨趨風纔仰于設施分行亟  
聞于遷拜馳情徒極悵諄誨之難親汎愛曲收承飛章  
之已誤此蓋某官勇于進善恕以取人振蝓屈于可伸  
之時飾輪困于有用之地故茲慰薦亦逮迂踈其在區  
區之衷敢忘皦皦之遇誓堅素節毋玷公言下情無任  
激切依歸之至

上尚書右丞啟

右某啟伏以富貴得以道膏澤下于民乃古人之深稱  
真丈夫之能事恭惟某官盛德重啟逢辰得君奮身公  
忠致位丞弼密若嘉猷之告廓然兼善之心四海衣冠  
同于馳仰一時議論孰不知歸而某苦塊餘生鄉閭屏  
處潛蒙大庇之及莫獻寸誠之勤茲就禮經載趨朝宁  
畏簡書之所迫圖造門而末由姑進悃衷少紓向望

謝執政啓

右某啟辭富居貧乃古人不得已爾讓夷急病凡志士

豈無心哉。蓋力有不能則戒于先迷，義或可違則退亦  
餘裕。當不肖輸誠之日，正鉅賢容物之時，收愧汗之泚，  
顏聽德言之善誘，頑非木石，銘在肺肝，恭惟某官器越  
伊臯，道深姬孟，推至懷于高位，廓兼濟于四方。以匹夫  
不獲為已，憂以片善必求為已，任採摭罔遺于樸，傲忌  
嫌無擇于葭，竦取之有方，寧與十禽之詭，舍其不逮，蓋  
矜五技之窮。若某之愚，其感也甚之，季路乘桴之勇，有  
仲將書榜之虞。方戴丘山之恩，遊愆轡策之指，唯區區



之微悞幸噉噉之見明可忘冰淵尚負芒刺鑽皮而出  
其羽固銜振拔之端投足而轉之波更起鳴號之望庶  
幾充擴仰報獎知舍茲而言罔識所措

謝吏部梁學士啓

右某啟託庇云初方懈勤拳之仰誤知何遽已蒙汲引  
之恩感衷倍蓰愧汗流浹竊以命有窮達不移者志士  
之所持位無高卑可尚者正人之所與蓋尊賢以能致  
其類故觀舉而逆知其倫儻非道守之優難起德言之

薦如某者性資朴拙術學迂踈自為囂囂未免碌碌效  
官無補久負壯行之心養內不忘徒完夜氣之息一昨  
鉅創始復餘憊僅支彈冠再迫于薦貧竊祿敢謀于擇  
地鷓枝偶附鼠枝奚施第黃卷之是耽于素餐兮孰甚  
幸逢高誼來踐名曹輒緣職局之微獲造門闌之峻承  
教既祛于茅塞飛章復冒于材稱雖知貴飾之榮實愧  
吹噓之重此蓋伏遇某官力行有逮自信甚明不遺片  
善而樂於進人不責全能而裕于接物故在抱關之黨

亦叨推轂之私敢不充擴所存端平其執庶保匪躬之節勿貽厚遇之羞舍茲以還罔識所措

謝李郎中林工部啟

右某啟伏蒙高義不遺過有論薦出于望外感激倍蓰伏念某降才冥昧沙道膚淺從仕久矣成效蔑然行學之志徒竊愧負頃緣家難之後餘息未泯無環堵以蔽風雨無擔石以給晨夕自力疲繭復造表著非唯量已而易祿殆亦久渴而甘飲委心鉤攷之末垂首簿書之

際卑枝一栖壯氣何在然而事權無與吏責甚薄坐糜  
廩食苟度歲月雖忘大易任重之患亦畏詩人素餐之  
刺以是碌碌自保固已厚顏尚何敢冀高位君子薦之  
于朝廷之上哉伏惟某官德量渾厚藻鑿融遠持衡公  
道推轂下列以進其所知為報國之務故力之可迨則  
引類不舍如某愚陋亦與收採豈失于多愛而惑于誤  
聽耶旋自揆省第深跼躄完冰蘖之守未足為清戴丘  
山之恩何以圖報更期勉勵于晚節庶或裨補于盛世

且以副知遇之萬一而不貽門下之羞也不勝悃悞之  
至塵冒觀覽伏增慚懼謹啟

賀謝中書胡舍人

右某啓伏審光膺制命榮陟詞垣休聲一傳羣口文慶  
竊以朝廷清明則賢者進號令溫雅則王猷尊唯要地  
可以試經綸之才非大筆不足當訓誥之重故西掖之  
高選為上心之慎求得人于斯今日尤盛伏惟某官珪  
璋其質金石其衷器業弘深文章醇正嶽嶽儒冠之上

廣譽莫先嶢嶢諫列之中直言無詘守道不回則天之  
與我顧義所在則國爾忘身繇齟齬于半途久間關於  
外補難抑至公之論果符遴揀之明立螭陛以記言豈  
容淹晚傍鳳池而裁詔遽歷清華在于嚮仰之情豁若  
隱憂之釋馳寸誠而尚緩荷累幅之見勤心愜至音殆  
幾于忘味目驚竒寶寧惑于暗投益欽盛德之謙光第  
發厚顏之愧汗款悰所感聲畫奚殫

賀范待制啟

右某啟光奉恩俞榮陞侍從正人遂進舉世忻聞萬舌  
一辭同誠相慶何則力禪國體忠賢為心膂之資識照  
事幾舊德有著龜之喻雖進退之有命實慘舒之係人  
故用舍無喜愠之榮而出處係重輕之勢在今日之寵  
授宜輿情之樂傳伏惟某官涉道深醇挺身中正聲華  
冠于仕路事業邁于古人不負壯行之心獨高任濟之  
美曩居諫列直言嘗及于免冠累剖使符遺愛每喧于  
卧轍更炎涼而易得外夷險以自如公議久存難緩中

朝之高選休恩荐至俄遷內閣之近班佇承大任之來  
行展鉅材之效尚稽馳賀首辱貺音捧累幅之輝光特  
多謙挹鏤中扃而銜荷莫克勝任愧忤所深叙陳罔既

謝戶部楊侍郎啟

右某啟區區之跡久玷知遇不圖今者復冒論薦感愧  
兼倍情誠靡極恭惟某官以道德術學早登近侍而注  
措施設莫不贊國助治為志其援挽收拾宜得瑰璋竒  
絕之材而舉之于朝使有以致用如某愚淺何足比數



而兩塵薦牘豈失于取之太恕而聽之或過耶如其不然蓋仁人君子儻有所知知其稍不宜捨則引之掖之期于利達有用而後已不忍坐視其窮而不加之力也繇是推之則某重被推轂之恩其所荷戴尤宜常心相萬若某之樸拙之守間關之勢為公之所諒舊矣不俟縷縷以煩聰明其感衷自勉力行晚途冀有以上答騰與固亦當藏諸心而深若銘刻不假逆陳于左右今其言者姑以示德公之賜而重為之儀且以異平日之請

見于門闌况瀆將命但增恐懼謹奉啟事陳謝伏惟台  
慈俯賜鑒念謹啟

代人謝舉學官啟

右某啟伏聞剡奏舉某堪充內外學官者明詔搜才獨  
繁禁近公言薦士誤及最微感恩則深揣已唯愧竊以  
國家間暇朝廷清明道德教化之淳典章法度之備陶  
冶萬類輝華太平登廊廟者襲迹咎夔列藩翰者比肩  
申台政事有龔黃之匹文章或班馬之儔抱忠履信而

濟濟何多應變適時而人人自若膏澤充於四海精神  
會于一時歷攷陳編之文莫踰今日之盛然猶慮崇學  
之未至患有材之未完近繇膠庠遠迨郡國必謹師儒  
之選以顯教導之功在于昌辰茲實先務渙若丁寧之  
令發于淵嘿之嚴付慎舉于邇臣蘄兼收于羣雋自非  
銳于博習固以力行造道逢原弼中彪外傑然而模範  
正沛然而聞識強則何以上副睿訓揀求之詳下當鉅  
賢論薦之重如某者生而樸野學不該通心無自得之

明性近困知之陋窮聖經之深遠僅涉其流慕賢業之  
光輝徒堅其志偶玷儒科之等初塵仕籍之聯方將刻  
意以進修豈足誨人而誘掖遽蒙翦拂俾應選掄循省  
非宜慙慙尤甚此蓋伏遇某官竭純誠而報國推兼善  
以及人誼有可采則進之不疑力有可成則施之不倦  
適仰承于休命爰下挽于寒生使之伸銖寸之能冀以  
入涓埃之助敢不擴充素蘊激勵懦衷究先王之典而  
罔怠服膺安君子之途而永忘改步庶完操守上答獎

知舍茲以還不識所措

代楊潛古授寶文閣待制知廬州謝兩制啟

幸假便藩叨聯近侍仰膺渙汗伏積凌兢竊以寶閣華  
資參禁中之要職淝州樂土總淮右之列城皆薦紳之  
共榮為當世之高選宜得明哲以承寵光下慰郡邑便  
安之情上副朝廷委寄之重如某者賦才拙陋臨事迂  
踈遭際盛時玷塵廡仕長棘寺而澄清無效貳省曹而  
經畫非功勉勤瘁于積年與冲和于此日懼貽後悔遂

乞偏魔夫何誠懇之微冒此恩俞之異過于所望理有  
攸歸此蓋伏遇某官德度淵深義端方格推人材之倫  
品贊國體之尊安陰加援助之仁默借吹嘘之勢敢不  
欽敬明命堅完朴忠暫休驥力之勞寧忘故步當比松  
心之壯不易晚彫庶補報之有成期始終之無玷上答  
生成之賜次酬譽飾之私

又謝前執政啟

叨榮近侍忝寄便藩仰冒寵光伏深愧畏竊以禁垣美

職參華內閣之隆淮甸名邦分總列城之劇宜得彊明  
之雋以當付畀之難內馬可以輸獻納之忠外馬可以  
謹承宣之任乃稱盛朝之選始安與議之公如某者識  
局不宏材資非穎誤蒙器使常懼顛躋幸賴明時獲伸  
薄效長理官之重刑成唯慎于哀矜貳民部之繁調度  
敢違于藝極更炎涼而既久慮疲繭以難支遂乞偏麾  
庶休勩迹何幸情誠之露遽霑恩命之優靜思厥由固  
有所自此蓋伏遇某官德高經濟才大將明表儀四方

羽翼多士瞻舊物而嘿加庇助憫孤蹤而曲賜吹噓致  
是拙踈玷茲華要敢不增修晚節務壯後圖戴門下之  
恩丘山愈重完曾中之守金石非堅寵驚彌戒于循墻  
功累勿虧于覆篲期始終之不貽異補報之有成上酬  
覆育之仁次答鈞陶之賜過此以往固知所裁

謝韓左司啟

右某啟曩叨公舉已冒德于積年今幸剽聞遽輸誠于  
一日豈後恭而先倨蓋情動而言形室聽既失于晚知



畏簡又拘于禁謁徒仰門闌之峻姑馳悵惘之微媿汗  
泚于面顏感衷發于毫穎伏念某材資非敏器識不宏  
間闕仕途黽勉祿食雖固時中之守已愆行學之心恥  
脅肩而若病夏畦治龜手而未免漉統第懷有命之俟  
敢冀當權之知在不肖貳淖之時正高賢按部之日措  
事每承于循理剗煩嘗受于指蹤唯圖譴責之逃豈意  
薦揚之及違旌麾于千里之外更星籥者八年於茲鉅  
創更肉而復生短翮一枝而易足適棲遲于卑局獲瞻

改于高風膺門方念于難登濤啟忽傳于密致玷重言  
而既久悟厚賜以何遲併新感忤之情尚賴包容之度  
伏惟某官量涵方格志擴公忠報國必舉所知取人不  
求其備故翦拂不遺于款段吹噓亦逮于輪囷敢不勵  
所存心安于履坦俾之有用寧少惑于膠榮必也終窮  
誓不移于勁節庶保踐修之正不貽獎遇之羞舍茲以  
還固識所措

得替謝執政

右某啟今月十五日受代已解職事者畫墁志食雖甚  
愧于無功藏器須時亦潛希于有用乍脫簿書之迹遽  
忘闕析之心蓋士人惟幸于逢辰而君子莫榮乎行志  
當道揆之盛旦卒官常于累年得逃瘵曠之愆實冒包  
含之賜義命所感情言曷勝伏念某樸樾小材迂踈末  
學早塵科第久涉仕途間關凡歷于七官荏苒將盈于  
三紀剗裁數邑切于民者罔不致詳倅貳兩州便于公  
者莫非極力飾吏敢繇于他道趣時每戒于苟為枉尋

直尺則義不忍聞吐剛茹柔則耻之有素但非詭遇何  
恤獲禽之踈儻以先容未甘蟠木之棄一昨鉅創初復  
餘憊僅支蕭然造朝勉以從事病渴固知于甘飲為貧  
寧慊于居卑投身鉤攷之間歛翮班聯之末日月易得  
孤筠四見其雪霜智力何施芒及久虛于盤錯茲幸及  
期而代可違尸祿之尤匪有使然烏能逮此此蓋伏遇  
某官力熙帝載道亮天工擴伊呂之才而沛然有餘推  
堯舜之澤而施之無外陶成世治悲歸粹美之風表正

官師盡勵忠良之操有惟熙之百志無不獲之一夫故  
俾區區之蹤亦同皞皞之泰遂終更而善罷保素守以  
自全某敢不愈激懦衷更堅晚節惟其所用固當盡瘁  
于明時若也終窮猶足仰歌于至化上答乾坤之施次  
酬甄鑄之恩舍茲以還靡識所措

代李尚書回王學士謝館職啟

右某伏審光奉宸恩榮遷閣職于薦紳而共喜寔清議  
之所歸何則石渠天祿之游仙府蓬山之比珍圖秘籍

充牣其中故老名儒萃聚于此歷代以為要地在仕以  
為美官先皇嘗罷其名聊以澄一時之敝上主復修其  
廢蓋將崇百世之文要之獨難其人必也能材諸位伏  
以某官器含方格學際淵微休聲遠過于等夷煩使累  
更于中外鉅賢引重固知公道之開盛世少明尤貴書  
林之選棘位躋淹于陪貳霄途佇見其超騰念展慶之  
未遑俄貺音之先及情詞良厚誦味不忘感愧所深叙

陳曷既

回王學士謝理雪啟

右某啟曲蒙踐牘竊仰情誠非罪橫罹知世人之共憫  
被恩昭雪喜君子之載亨過形推謝之言愈服撝謙之  
度伏以某官性資冲厚術學宏深蚤參文館之游嘗預  
樞庭之屬即事功而有裕養器業以無虧德靡不常烏  
有承羞之患疾生無妄果成勿藥之痊市虎之善謗已  
消塞馬之亡蹤自復在旁觀而甘愜寔衆論之攸歸瓦  
弗怨飄益重遜辭之示圭方磨玷尤忻美寶之全既愧

勤衷且馳賀意悽悽之款縷縷奚周

謝授職任啟

右某伏蒙聖恩授前件差遣公言密啟幸遇已知之深  
明命曲成叨膺使指之重汲引固榮其所自甄收竊懼  
其不勝惕然情誠曷以報稱何則轉輸所總刺舉是兼  
繫一道之戚休分九重之憂慮謂邦財必裕所宜先者  
藝極之供謂民力必舒不可存者培克之獎摘伏發姦  
則有殘苛之戒匿瑕含垢則虞偷惰之風惟公私之便



安惟寬猛之均濟乃號稱職是為得人是非術學有原  
智能無蔽疊疊通適時之務滔滔懷應變之才則何以  
副器使于外臺助休明于盛世如某者降才不敏造道  
未深間闕徒久于效官蓄縮每慙于行志衆皆譏其骯  
髒心自信于迂踈識不足以窮物之微謀不足以經事  
之遠即侵尋于老境甘連蹇于仕途夫何朝論之餘擢  
以漕權之佐既私憂於任重且內省於寵驚勉圖陳  
力之疲敢有望洋之避全牛無見將希投刃之能蠲木

不遺盡賴先容之賜此蓋伏遇某官闢至公之路廓兼  
善之心以惠民報國為材難以進善舉能為己任虔奉  
丁寧之訓詳求端正之倫因汎及于陋儒遂偶當于遴  
選振揚滯迹獲出鉅賢之門馳走修途往欽煩使之命  
敢不至其不逮求所未知察利病于列城審施為于庶  
務孰為盤錯潛忘利器之矜何憚雪霜終保勁松之節  
上答生成之造次酬獎拔之私舍茲以還固識所措

到任謝執政啟

右某伏蒙聖恩授前件差遣已到任管勾者綸言督遣  
度奉丁寧化筆品題叨逢採拾趣辦嚴于決日旋叱馭  
于畏途固蘄悉力以蒞官第懼非材而速戾視事云始  
操心甚危伏念某識昧通微術踈應變投步雖安于履  
坦謀身每拙于趨時仕也為貧何慕潛光而隱耀得之  
有命未嘗直尺而枉尋沙三紀以數竒秉一心而自信  
誰言高翮不在卑栖常恨壯行未酬幼學齒髮踰始衰  
之境情誠忘銳進之政方混迹于薦紳甘擬倫于樗散

夫何幸會遽冒恩俞付一道之事權委十州之餽運曷  
由逮此固有使然此蓋伏遇某官以道致君以忠報國  
邪正一歸于區別滯淹盡出于搜揚明黜陟于朝端坦  
若至公之路示儀型于天下昭然丕變之風曾惟樸楸  
之資亦玷甄收之賜敢不勵其職業慎所施為體明時  
愛物之心念遠俗懷生之意肅齊郡縣俾無擾暴之殃  
撫馭邊陲庶絕驛騷之患上答乾坤之施次醕鈞鑄之  
私舍茲以還罔識所措卑情無任激切依歸之至

謝執政啓

右某伏蒙聖恩授前件差遣到任管勾者虔奉綸言之  
光再叨煩使仰繫化筆之力仍玷誤知辦嚴遽涉于修  
途卜日敬臨于始事思所報稱內惟慙慙伏念某造道  
不深降才非穎迹雖安于履坦術未迫于逢原竊祿無  
功庶類畫墁而志食秉心有守曷虞為範以失禽間關  
三紀之餘黽勉衆人之後暨齒髮之垂晚幸陶甄之曲  
成俾之宣力于遠方必也竭精于庶務既逃譴累復預

選掄荐更漕輓之權亟付甌閩之部及非甚利獨憂盤  
錯之當拔本易窮難強飛游之短烏敢引避第欽所緣  
此盖伏遇某官誠亮天功力熙帝載邁臯夔之事業贊  
堯舜之聰明擇官必度其能何嘗虛授責實不求其備  
固在有容曾惟朴拙之資猶冒品題之賜某敢不益堅  
素節愈激懦衷窮利病于八州敢輕舉錯察正邪于羣  
吏必示勸懲庶職業之粗修效涓埃之小補上答乾坤  
之施次酬鈞鑄之私舍茲以還不識所向

上蔣穎叔啟

右某言念自違鈞庇日企台光帳竿牘之莫修戀門牆  
而徒劇伏惟坐顓方面倍擁福禧恭以判府樞密觀文  
稟天元精為國重器學貫古今而行之以道智窮事物  
而處之以中顓然具多士之瞻偉矣富真儒之業玉堂  
揮翰潤色訓辭之嚴樞府運籌宣威沙漠之遠功茂寢  
兵之盛懇辭秉政之勞誠心上感于清衷俞旨曲從于  
勤請壓全吳而臨重鎮人慶歌襦過故里而擁高牙世

欽畫錦某夙叨恩遇久玷仕途竊慙無補于時已遂投  
閒之乞方圖問舍即從桑梓之歸將獲望塵復戴幘幪  
之賜願延鼎鼐之召庶慰旄倪之情伏望上為廟朝精  
調寢餽卑情無任依歸祝頌之至

謝新及第狀元以下十八人啟

右某伏審莫陞臚傳桂科魁選聲華籍甚中外翕然

餘云

唱第楓宸飛名桂籍  
聲華霽著中外翕然竊以新恩狀元先輩行誼出倫文

章根道射策吐胷中之蘊程能冠天下之材

餘云決科  
高天下之



材  
輿論一時方駭飛鳴之異層霄萬里佇觀事業之光  
念展慶以未遑辱長牋之先及感慚彌切敷叙奚周云  
云

謝解啟

竊以士懷經濟之能所希乎遇主君有治安之術莫盛  
于得人蓋無其位不足為兼善之資非其臣不能成獨  
化之業聖賢相濟今古一端政教之原根基于此然而  
不由道而入仕謂之竊天官不盡禮而取材謂之輕國

噐故公朝有特起之命深谷無自媒之心聘之甚勤至者見用或離疏而踐廊廟或起畝而登公卿皆高誼之素聞故大任之亟授迨時寔改干進實繁採求難以見其詳考覈于是掄其等漢以策為繩準唐以賦為銓衡雖文詞未足盡才然輔相亦由茲選國家垂統數世紹隆前王伊周呂召獻其明臯夔稷禹布其職察廉進善天下無沉棄之人聚精會神彀中皆豪雋之黨尚猶深講治具間頒詔音凡預鄉論俾參郡舉其在進揚之始

亦沿聲律之程非徒角之空文蓋將求于實效草萊疎  
賤不以勢而間然社稷忠良盡此途而出矣自非超異  
曷副詳延若某者性近顛愚識非通博衆皆譏其寡合  
心自信于安貧未嘗捨義而求從唯懼立身之不至學  
當為已慕古儒而必行祿未及親與人子而同患念昔  
年之挫及復今日以彈冠豈期誤中文評輒偕計籍顧  
藝能而知短當推薦以懷慚事出不圖恩歸有地此蓋  
伏遇某官扶持文教翦拂士流贊聖人側席之求助鄉

老登書之選飾駕成驥俟十駕而責其功揉曲為良薦  
萬乘而適于用欲使無聞之品亦皆有補于時敢不恪  
厲深衷堅持大節此馬充賦詎甘忝冒之名必也揚庭  
願脫阿諛之恥庶幾微蕞無玷獎知過茲以還不識所  
措

謝及第啟

右某啟三月二十一日皇帝御崇政殿放榜蒙恩賜進  
士出身仍當日釋褐者公選精明當收賢者聖恩恢廓

亦及幸人拜命雖榮揣心甚愧竊以為君獨治自古共  
難必求良臣以責顯效奈至旌旗巖谷物色草萊召以  
禮不召以威取其人不取其闕棄版而相商宗聘之特  
勤舍漁而師周王遇之甚渥托一時之卜夢新四海之  
聽瞻皆謂有非常之才固當為不次之舉然茲殊典難  
格後時永惟取士之詳莫若設科之要自漢而降由唐  
以還較評雄詞區處羣彥文章凜凜共高當世之風圭  
紱班班率借此途而出非唯試藝足號得人國家世統

靈長治原翕絕野無棄士廷有力臣坐廊廟者以伊夔  
處心列藩屏者以呂召任已臺閣講議輝華乎典謨膠  
庠絃歌暢導乎禮樂備閱前代無加本朝尚猶間下詔  
音廣招雋類凡預鄉書之薦俾繇禮部而陞然後引之  
天庭揭以聖訓儻有中程之狀悉膺署第之光然而聲  
律之間可容妄作爵命之重豈宜濫當高或致槐棘之  
尊下或取郡邑之貴所繫悉大其才寔難雖在伊人之  
為盡由今日之選自非超異曷副詳延若某者生而賤

貧性復庸野不能治產尤喜執經衆皆謂之僻儒心獨  
安于直道無闊達之度常愧于古人負空虛之資俯羞  
于浮俗始千里選一點文評崎嶇數年連蹇萬態學如  
短綆信未及于淵源志若疎筠曾不遷其節操時可佐  
而位無所踐親欲養而祿無所干忠孝未全日月易往  
復偶旁求之命再興妄進之懷雖焚舟以示于必行而  
發策尚虞其難得豈意鄉老貢迹太常籍名幸趨遂旒  
仰待明試天題淵秘落筆辭窮畫景迅馳舉目心隕僅

綴三篇之略殊無一日之長所憂罷歸敢覬榮擢泊中  
楹之唱等唯上意之第能不圖微軀亦玷後列寵乎踰  
分理則有歸此蓋伏遇某官甄陶儒風儀表世教佐主  
而求士欲無所遺噐人而盡材容有不備使淺聞之賤  
介亦見采于明時敢不永勵赤心堅持素節固異金朱  
之樂願伸犬馬之能上酬國恩次答鈞造降此以外不  
知他為某卑情無任感荷激切知歸之至

到任謝執政啟



右某伏蒙聖恩授前件差遣已于三月十七日到任管  
勾訖被遣按刑奉絲綸之明訓退思踰分荷甄鑄之深  
仁奔馳備歷于險巖督察始臨于疆境憂其非據情所  
不勝伏念某造道不深受材非敏第誠身而自信茂求  
外以苟為間關從任之勞荏苒歷年之久雖不足趨時  
而應變固未嘗直尺而枉尋持節遠方荐忝皇華之使  
坐曹中省幸參白首之郎徒堅報國之心實愧食功之  
祿方謀引迹欲丐投閒不謂誤恩復加煩使况治世所

矜者重輕之典清朝尤恤者幽遠之氓儻匪精明之資曷當刺察之任汎及孤拙豈無夤緣此蓋伏遇某官誠亮天功力熙帝載坦闢公平之路判分邪正之儔取人無求備之難分職有因能之妙曾惟朴陋亦玷品題敢不愈激懦衷勉圖微效去姦助善列城共底于澄清急吏寬民庶獄必祛其寃滯冀少裨于忽杪期不玷于明昌上酬覆燾之恩次答鈞衡之賜舍是而語詎知所裁卑情無任感戴激切之至

上執政啟

右某啟屈躩求伸迺品物之常理涸鱗希潤宜至仁之  
動心在愚慮以甚危望台階而遠叩情言迫切進退凌  
兢伏念某樸樾小材倥侗末學蚤從祿仕久困塵泥竊  
料幾四紀之深效官逃十任之責自叨使指屢易歲華  
始巡巴蜀之封旋領甌閩之部悉為遠地豈敢告勞周  
旋六載之中間關萬里之部既每勝于諏詢謀度且備  
嘗乎險阻艱難下繩州邑之勤上賴朝廷之福財賦不

愆于供貢盜姦畢即于誅鋤凡兩及于終更敢自言其  
善狀洎預造庭之列濫充典客之員白頭雖愧于郎潛  
素節固欺于士論自公退食曾不越思有道誠身未嘗  
詭遇羞捷徑之窘步愧鑿墉而益高僂俛再暮顯蒙特  
立幸遇聖政赫日新之盛真賢贊道揆之明未見斥于  
冷官遽復蒙于煩使仰軒陛訓辭之重念廟堂驅策之  
榮義難固辭樂就遠適然而離鄉六七千里去國五十  
九程每航不測之淵常蹈無窮之嶮或烟瘴浸淫于晨

邁或虎狼驚突于晝行固奚卹于輕身唯恐罹于曠載  
飭列城于明慎做庶獄于公平雖未全遠罪之風亦庶  
絕非辜之嘆勤瘁不忘于終日拘孿已閱于三冬篋瓜  
代以過期丐行符而剡奏皇皇俟命慄慄齋心重念某  
齒髮日衰關節痰動昏花眊視渴涸消中乃緣衝冒之  
勞以病叢微之質俾之久處實重私憂輒希仰首之鳴  
號不避黷尊之罪戾恭惟某官功高總揆志遂澤民以  
唐虞之道致吾君以稷契之忠任吾已不忍匹夫之失

所贊成四海之升平察其露懇之誠寬此冒威之譴回  
台輝而下燭運化筆以曲成庶幾垂盡之愚獲被更生  
之賜誓堅晚節上報鉅恩干浼尊嚴某卑情無任惶懼  
激切之至謹具啓事陳獻伏惟鈞慈俯賜鑒念

謝兩府啟

右某啟伏蒙聖恩差知明州軍州事已于七月二十三  
日到任管勾訖過瓜受代四年久使于遠方剖竹分符  
數月遽更于兩郡露奏獲伸其誠府把麾遂適于鄉關

仰承優渥之恩悉自埏鎔之力唯知感激第切凌兢伏  
念某術學空疎性資朴拙早繇仕路久玷朝紳竊祿幾  
四紀之深持身堅一節之守隨時頽仰鄙世俗之可羞  
與道卷舒慕古人之特立每懼過情之聞敢希虛受之  
官固宜自分于踈閒何幸誤膺于識拔與郎潛者再歲  
奉使指者十年間關雖竭于勤勞翻忽殆忘于禔補旋  
省衰疲之質恐貽忝冒之譏刻章屢叩于九閭拜命果  
分于千里况四明之善壤為三泐之美邦民饒畝畝之

膏腴地有山川之清勝冠蓋無往來之冗厨傳絕修飾  
之勞利烟海之魚鹽衆皆樂止近武林之桑梓人頗榮  
之設令自擇以居所欲不過如此斯蓋伏遇某官力熙  
帝載誠亮天工別忠邪以禪極治之朝明黜陟以贊仰  
成之政致此寒微之迹遂其安便之私某敢不鉅細悉  
心夙宵竭力承流宣化庶無愧于昔年利國惠民願有  
為于今日上答乾坤之賜次酬陶冶之仁過此以還罔  
知所措卑情無任荷戴知歸之至謹奉啟事上謝伏惟




鈞慈俯賜鑒念

謝戶部虞尚書舉自代

右某啟竊聞剡奏舉某自代者某衰晚孤蹤荒落舊學  
無所堪可日思退縮豈謂八座高賢一時碩德特不遐  
遺過有論薦且榮且愧惟感惟幸恭惟某官以忠報國  
以義取人舉其所知不嫌故舊之密施于有政祇期器  
識之宜夫何汎及于匪材不宜少牽于多愛雖欲激昂  
以酬知遇于清明之世其如罷輒不克荷承于激引之

恩仰銜賸錄不勝惓惓之至謹具啟上謝伏惟台慈俯  
賜鑒念謹啟



錢塘集卷九

欽定四庫全書

集部  
錢塘集卷十

詳校官庶吉士臣馬履泰

檢討臣何思鈞覆勘

總校官檢討臣何思鈞

校對官主事臣陳文樞

謄錄監生臣黃臣鵠

欽定四庫全書

錢塘集卷十

進興龍節功德疏

宋 韋驥 撰

右臣伏以光華盛旦幸逢誕聖之辰精確虔誠仰  
祝後天之冥集緇黃於淨宇演道釋之秘文藉為  
臣子之勤欽奉邦朝之慶恭惟皇帝陛下膺圖繼  
統御世承平性均二帝之仁政邁三王之治祥推遠

斗適當千載之期節慶興龍咸讚萬年之壽憑真詮  
之至妙介景福之無疆永助堯齡豈愧梯航之獻遙  
瞻魏闕更希葵藿之傾臣無任瞻天祝聖激切屏營  
之至

又

右伏以千齡景運欽逢誕聖之辰四海驩心競起祝堯  
之敬精懇仰祈於萬壽真詮共演於三旬恭惟皇帝陛  
下獨攬權綱紹隆統業默運至仁之化增高極治之風

昌期擁帝暎之休慶旦協歲成之候臣忝司遠部遙致嚴  
宸憑梵衆之虔誠即金僊之淨宇宣揚秘典合集勝緣  
騰寶軸以載馳望玉階而恭獻伏願鴻圖惟永勢等于  
乾坤睿算無疆數均于箕翼臣無任祈天頌聖驩呼激  
切之至謹具疏以聞謹疏

又

右臣伏以上主誕辰運協千齡之慶四方翹首懇祈萬  
壽之隆敬宣秘典仰祝鴻休雖乾坤之賜欲報而無由

蓋臣子之心有誠而必盡恭惟皇帝陛下仁如堯舜治  
軼商周紹隆先烈之光增重太平之業清明華旦夙欽  
電斗之祥向慕遠人悉奉梯航之獻臣忝司遐裔遙跂  
中宸先期憑梵衆之勤彌月演真詮之妙伏願帝圖惟  
永對北極以齊尊聖算無疆與南山而共久臣無任祈  
天頌聖激切驩呼之至謹具疏以聞謹疏

坤成節功德疏

右臣伏以應十年之運慶辰密比于中元贊萬壽之祺

虔懇率同于下國彌月集緇黃之衆維時宣道釋之經  
庶竭臣誠仰祈睿算恭惟太皇太后陛下德隆任似仁  
邁勳華固宗社于無疆納生靈于至治聖神誕節適當  
坤德之成遐邇驩心共祝帝齡之久臣官居蜀部迹遠  
嚴宸效傾藿以徒勤跂稱觴而莫及忻逢盛旦遙欽魏  
闕之尊敬藉真詮竊慕華封之祝臣無任瞻天望聖激  
切屏營之至

又



伏以玉律在申正協坤成之候素舒既望雅符聖誕之  
期慶辰丕顯于明昌率土悉同于鼓舞演真詮于彌月  
禱睿算于後天恭惟太皇太后陛下仁邁唐虞德隆任  
如納寰瀛于至治之極固龜鼎于無疆之休節繼中元  
密契千齡之遇情均下國仰祈萬壽之延臣等恪守遠  
官忻逢盛典旦飭精虔于梵衆藉勝妙于貝文遙欽魏闕  
之尊輒效華封之祝臣等無任瞻天望聖抃躍屏營之  
至

又

右伏以聖神誕節盛當坤德之成臣子歡心仰贊帝齡  
之永集緇黃于精舍演釋道之秘文彌月伸虔溥天一  
致恭惟太皇太后陛下仁參覆載化被華夷保基業于  
安強納生靈于富庶運符千載慶辰密亞于中元誠祝  
萬年勤禱率同于下國臣等職拘閩部迹遠楓宸稱觴  
莫繼于簪紳向日但希于葵藿藉真詮之有助祈睿算  
于無疆臣等無任瞻天祝聖激切屏營之至謹疏

進興龍節功德疏

右臣伏以遇聖神之誕日曲盡虔誠演釋道之秘文仰  
祈睿算雖乾坤之賜難報蓋葵藿之心必傾恭惟皇帝  
陛下繼統明昌持盈憲度光大祖宗之業均齊堯舜之  
仁繞斗效祥昭契千齡之盛興龍慶節咸歌萬壽之祺  
爰藉力于真詮永延洪于景祚拳拳馳敬遙欽魏闕之  
尊懇懇獻言竊紹華封之祝臣無任瞻天祝聖激切屏  
營之至

又

右臣伏以祥電繞斗雅符聖誕之辰飛龍在天盡冒君  
臨之澤率土敬祈于萬壽真詮共演于三旬恭惟皇帝  
陛下治越成康德侔舜禹納生靈于富庶保基業于隆  
平昌期擁帝眷之休慶旦協歲成之候臣忝司閩部遙  
跂楓宸憑梵衆之精虔就佛宮之嚴潔宣揚秘典成集  
勝緣緘寶軸以遠馳望玉階而仰祝伏願鴻圖惟永齊  
久于乾坤睿算無疆比隆于箕翼臣無任瞻天頌聖激

切懽呼之至謹具疏以聞謹疏

天寧節進功德疏

右伏以千齡慶節允符天德之寧萬國誠心共祝聖人之壽集緇黃于寶刹演道釋之真詮敬修彌月之勝因仰贊無疆之睿算恭惟皇帝陛下性仁御極稽古紹圖守成光七聖之規發政出三王之表言納萬堯而輿情上達恩霑動植而和氣四流渚繞樞幸遇誕辰之盛望雲就日咸輸精禱之勤臣恪守州符遙欽魏闕藉虔

誠于淨侶宣秘典于累旬伏願龜鼎靈長佑明昌于億  
世冕旒垂拱保安治于萬年臣無任瞻天頌聖驩呼激  
切之至

又

右臣伏以造化元功方慶歲成之序聖神誕節允侔天  
德之寧寰區欣千載之逢鐘梵祝萬年之奠恭惟皇帝  
陛下德參覆幬明合照臨建皇極以承天運陶鈞而御  
史智執兩端而用中如舜仁不徧愛而急賢若堯熙熙

極治之時皞皞可封之俗光輝自昔咸欽繞斗之祥謳  
頌于今競起望雲之禱臣恪司符竹遙仰闕廷集淨侶  
以先期演真詮于彌月伏願皇圖鞏固益隆不拔之基  
聖壽增榮永保無疆之福臣無任瞻天頌聖驩呼激切  
之至

進興龍節銀表

進奉興龍節銀一千兩

右臣伏以明聖誕辰咸祝萬年之算方隅禮貢莫先九

牧之金前件銀山實效珍地非愛寶助盛旦充庭之末  
輸遠臣任土之誠冒瀆宸旒臣無任瞻天望聖激切屏  
營之至謹附福州綱詣闕上進以聞謹進

同前

右臣伏以誕聖慶辰幸邁千齡之運望雲恭貢敢希九  
牧之金前件銀任土效珍充庭致禮仰祝後天之算遙  
傾向日之誠干瀆宸旒臣無任瞻天望聖激切屏營之  
至其銀謹附南劍州綱詣闕上進以聞謹進



同前

右臣伏以慶節光華咸祝萬年之算貢金明潔可參前列之龜前件銀地不藏珍禮由任土式助充庭之末敬伸向日之誠臣無任瞻天望聖激切屏營之至

進奉坤成節銀狀

右臣伏以倪天誕聖協千載之慶辰列國望雲祝萬年之睿算均驩心于無外致貢物而有常前件銀任土所宜效珍于遠願充庭實之末庶竭葵傾之誠干冒宸慈

臣無任瞻天望聖激切屏營之至

進天寧節銀絹狀

銀五百兩 絹五百疋

右臣伏以上主誕辰咸起後天之祝四方禮貢各修任  
土之儀前件物山岳效珍蠶桑致用敢備充庭之末仰  
祈萬壽之隆干冒宸旒臣無任瞻天望聖激切屏營之  
至

又

右臣伏以君王誕節有生皆樂其聖時臣子勤誠任土  
各修其方貢前件物精堅為品組織效能仰塵北闕之  
嚴上祝南山之壽干瀆旒宸臣無任瞻天望聖激切屏  
營之至謹錄上進以聞謹進

代楊侍郎使北表奏書狀

賀十二月  
七日生辰

白溝謝御筵奏狀

肅將信幣方趣赴于慶辰始及鄰疆遙遠頒于禮宴旋  
省馳驅之迹仰銜犒勞之私感激良多敷陳曷諭

新城謝撫問表

叨被恩私曲加存撫

謝中

竊以睦鄰修好慶誕講儀擁節

光華將致國書之重傳辭溫厚載懷郊勞之優榮感所并情誠莫罄

燕京謝酒果奏狀

載馳驛騎方憩留都渥恩與厚禮兼隆嘉實共醇醪並賜益滋銜荷難極叙陳

檀州謝賜湯藥表

馳慶寶鄰念修程之邁邁拜嘉珍劑荷殊惠之駢臻謝  
竊以聘節在途時寒應序曲被撫存之厚遠貽服餌之  
良仰冒眷慈內深兢惕

副使奏狀

叨陪修聘方跋履于長途幸預拜恩獲緘藏于良劑仰  
戴撫存之惠伏增感激之誠

中京謝皮褐衣物等表

存辱寵私遠頒衣褐中謝以恭修國聘寅奉使華荷賜

有加曲降凝嚴之備撫躬知幸都忘衝冒之勞惠雖被于體膚感實深于悃悞

謝簽賜酒食奏狀

信睦顛修方此車徒之憇匪頒遽及沛然醪饌之均仰味恩霑第增誠感

謝館宴奏狀

乍息乘軺方勤授館遽承宴犒尤荷寵綏仰優渥之所加叙懇悰而罔既

謝合食酒果奏狀

觴豆曲頒仰銜醇厚之味果餚兼賚飫享甘鮮之珍叨  
美貺以滋多揣愚衷而甚忤

謝生餼奏狀

茲展慶儀屢蒙禮賜既霑榮于宴勞復拜貺于餼牽感  
與愧并情非言究

謝射弓御筵奏狀

義隆鄰好禮浹賓榮肆筵敦示惠之情講射尚和容之

節敢自矜于穀率徒有愧于堵觀荷遇從容省躬悚幸  
謝春盤幡勝奏狀

春陽應候禮餽適時嘉蔬助旅食之甘綵勝增使華之  
美累膺寵賚倍積感慚

謝餞筵奏狀

致幣奉觴既成儀于誕節還朝復命仍叩賜于祖筵即  
就道以言旋唯銘心而倍荷

回燕京留守三幅



振轡使軺將講寶鄰之好假途留鑰幸瞻宗戚之風荷  
華翰之首貽在鄙誠而倍感

副使

叨陪使驛幸過留都首蒙誨翰之華仰服謙沖之度竊  
深榮荷曷罄敷陳

謝燕京留守請赴筵

持旄暫弭幸通謁于門闌飛翰見期重伸誠于觴豆仰  
銜厚意尤激深情

副使

假道宗藩幸參使事貽書賓館特辱禮招荷賸勞之過  
勤懷慙慙而彌甚

謝燕京留守餞筵

使畢南歸復閱別都之盛禮勤東道特伸祖席之華感  
厚遇以不忘叙繁言而莫既

副使

復繼還軺荐經留鎮方在脂車之隙更叨餞席之榮荷

德彌深銘哀無已

回中京留守三幅

馳慶誕辰方恭修于國聘假途留鑰將仰覲于賢規敢  
意謙冲先貽緘翰其為感忤何以諭陳

副使

參華持節取道別都敢圖厚德之冲先損緘題之况荷  
慙無已敷叙奚殫

謝中京留守召赴筵

行方弭節幸少憩于留都待以肆筵固益欽于主禮仰  
當寵召深愧勤誠

副使

忝陪銜命幸獲披風敢希留務之餘特有燕私之召愈  
增感服難盡喻云

謝中京留守餞筵

禮成復命再出名都義重叙違更勤勝餞唯仰欽于顧  
遇但併積于感銘

副使

畢聘言旋歸途載復何幸蕃宣之重過形餞送之勤拳  
跂謙光鏤銘心曲

回中京留守攀迎狀

聘好已修方迴策馭道塗所歷復過封畿仰睠意之益  
隆辱緘題之先貺感慚之甚悰悃不勝

副使

叨貳使車既成講好復經留甸載獲望風過蒙枉教之

光益甚厚顏之愧

回諸州攀迎

好通鄰域道出樂郊方叱馭以言還遽飛文之見及感  
勤茲甚叙懇奚周

副使

出疆訖事還闕戒行忝參貳于傳車復經繇于樂土首  
辱緘勝之貺竊深佩刻之悰

謝諸州請赴筵

趣還馳傳復道名疆遽沐榮緘曲形嘉召欽勤誠之相  
厚寘鄙意以獨深

副使

幸陪歸使再歷要藩敢煩治具之延何意貺音之逮悞  
慚殊劇紓述奚窮

回諸州餞送

馭叱星軺心馳天闕更煩祖餞之禮尤助歸途之榮載  
仰勤勛不勝銜感

副使

還貳轡軒復經名壤辱貽書而加禮煩供帳以餞行悚  
荷兼常敷宣莫及

回諸州遠迎

恭持聘節幸出治封欽厚意之特勤枉柔緘而先辱即  
諧展叙聊致款誠

代鴻臚陳卿使北表

謝白溝御筵奏狀



恭持信幣頌奉慶辰戒行將謹于出疆加禮首煩于命  
介仍霑宴衍益佩恩榮感懌所深情誠莫既

新城謝撫問表

叨被睠私曲加撫問

中謝

竊以講睦鄰之好修慶誕之儀

寅奉使華將肅成于禮命仰膺郊勞已懽服于德音旋  
省愚衷第知厚幸

燕京謝酒果奏狀

受辭文陛馳慶寶鄰方憇止于別都遽頒宣于嘉惠醇

醪溢榼美實盈籩仰味恩慈深銘肺腑

檀州謝湯藥表

仰奉臚傳曲頒藥餌

謝中

竊以睦鄰講信持節在途執獻

壽之清觴將陪盛禮錫尚鑿之良劑首服除私拜命載  
惟撫躬增感

謝賜毛褐衣物表

遠諭綸言榮頒毳褐

謝中

竊以恭修國聘夙駕使軺方趨

奉壽之辰先荷賜衣之禮服之以拜固知狐貉之非溫

被而在躬孰謂雪霜之可畏刻肌彌感叙懇莫殫

謝館宴奏狀

乍息乘軺遽蒙投館將講鄰歡之信叨承宴犒之儀優渥所霑悚惶彌劇

謝簽賜酒食狀

甫及誕辰將伸慶禮方車徒之就舍俄飲饌之霑恩仰奉瞻存但增銜感

謝合食酒果狀

致幣稱觴恭修鄰好投醪懷核屢決賓榮仰厚遇之有  
加俯卑惊而知愧

謝春盤幡勝狀

新春應序嘉貺適時俎有珍蔬助甘滋于旅食首加綵  
勝增賁飾于使華第切忻銘不勝悃悞

謝生餽奏狀

恭修賀慶已蒙宴犒之優曲被恩私更及餽牽之厚仰  
懷遇待愈積悻慙

謝射弓御筵奏狀

寵厚肆筵禮優講射幸享娛賓之厚愧無中鵠之功聲  
畫所窮悃誠莫究

謝餞筵奏狀

禮成誕節將復命于明廷義重鄰歡載承恩于勝餞行  
矣言旋之迹悠然懷感之情

謝觀打毬表

駿馬爭驅廣場增氣神珠應手衆目駭觀中謝竊以載舉

宴儀曲優賜節既豆觴之嘉惠復馳擊以侑歡臣等將  
命茲時預觀為幸仰念寵嘉之厚益增愧荷之深

回燕京留守三幅書

講驩鄰域叨使指以載馳假道留都幸宗臣之相際首  
辱絨勝之貺但深銘感之懷

回燕京留守請赴筵

乘輶假道方幸于晤言飛翰見招益欽于禮意其為欣  
荷曷罄叙陳

謝燕王餞筵

茲幸使還復經留鑰曲蒙主禮更肆祖筵仰厚意之益  
勤俯深誠而增愧

回中京留守三幅書

馳慶誕辰假途留鑰方幸披風之便首蒙枉翰之勤感  
忤所深敷陳奚究

謝中京留守餞筵

還轅復命再出留都具禮餞行重勤祖席仰欽瞻厚第

切感銘

回中京留守攀違

持節言旋既蒙厚禮飛文叙別益仰勤誠在愧感以難  
名唯保調而是請

回諸州攀迎

幸成使事復過郡封荷雅睭之曲敦枉華緘而先及即  
諧瞻晤可罄款誠

謝諸州請赴筵



還叱輕輶復繇樂土遽辱餞題之貺將伸觴豆之勤竊  
荷嘉招但銘私悃

謝諸州餞送

使還假道既幸于晤瞻主禮致勤重煩于餞送情非言  
喻感與愧并

代衛尉陳少卿使北表奏啟狀

白溝謝御筵狀

因時講好尤重春元銜命出疆首蒙恩渥仰荷宴慈之

及益增使事之光竊感固深繁言莫究

新城謝撫問表

叨承音旨曲被撫存

謝中

竊以改歲慶元睦鄰修好恭持

信幣道方肅于宵征遠冒德音禮有加于郊勞其為榮

感莫罄悃悃

燕京謝酒果奏狀

使軺適邁方憩別都禮賜遠頒益欽異數既享醇醪之  
味兼嘗美實之珍銜感無窮書言曷致

檀州謝湯藥表

交慶春朝將展寶鄰之聘拜嘉樂土遽蒙珍劑之頒中謝  
竊以擁節馳驅際時凝凜曲軫修程之跡特推良餌之  
恩祇受載維仰銜無已

副使奏狀

參陪使節馳騁鄰封荷軫卹之異恩捧調和之良劑唯  
珍服餌彌刻肺肝

中京謝皮褐衣物等表

星軺言邁天氣冽寒曲被恩慈遠加衣褐謝中竊以恭修  
國聘肅奉使華衝冒遵途方有疑嚴之憚匪頒在筭遽  
承溫煥之私撫已增榮銘心知感

謝館宴奏狀

乘輶稅上拜賜稠重既蒙授館之安復荷加邁之禮寵  
綏所逮銘鏤奚殫

謝簽賜食奏狀

車徒方憩將展慶儀醪饌有加均霑寵數極情誠而增

感在筆舌以奚窮

謝合食酒果奏狀

樽壘曲賜醇美既霑銷核旅陳珍鮮並享仰冒眷慈之  
重愈深銜感之誠

謝生餽奏狀

恭致國書屢承臺餽宴犒已霑于優渥餽牽復繼于頒  
宣感悞不勝敷陳罔既

謝射弓御筵奏狀

射惟觀德宴以示慈茲緣鄰好之修遂玷賓榮之貺能  
非志毅徒有酬觴慙荷休恩充盈卑悃

謝春盤幡勝奏狀

律變時春恩加節物柔蔬薦味綵勝增華益欽禮餽之  
優幸作使光之助

謝餞筵奏狀

禮成修聘將復命以言旋恩厚肆筵叨餞行而知愧  
皦永懷于心曲悽悽難盡于筆端

回燕京留守三幅

講好鄰邦取途留府何幸藩宣之重先形翰墨之華感  
作兼深紓陳奚既

副使

叨貳使軒幸經留鑰敢圖謙德首辱榮緘荷禮遇之勤  
劬在悃悃而悚息

謝燕京留守請赴筵

茲幸假途獲睹旌麾之盛特勤飛翰見期觴豆之延祇

服睽私彌深感愧

副使

弭節留都幸聆廣譽枉書候館曲被嘉招仰欽存勞之  
私第積感慚之素

謝燕京留守餞筵

訖事旋歸道載經于留鑰伸誠將送禮尤厚于祖筵銜  
荷不忘指陳莫極

副使



幸參華節再歷名都方重別于音徽更叨承于飲餞彌  
深感仰曷罄敷宣

回京留守三幅

馳驛鄰邦方勤于修聘假途留鑰將幸于聞名敢意為  
謙先煩飛翰感慚滋甚敷諭奚周

副使

叨陪使節幸涉留都荷瞻與之特勤枉緘封而先及其  
為感悞曷罄敷陳

謝中京留守召赴筵

夔憩星軺幸茲授館遽承珍翰期以肆筵仰厚意之過  
勤撫深悰而增愧

副使

參貳使華之行獲經美治敢希留務之隙時枉寵招悚  
荷所深喻名奚究

謝中京留守餞筵

使軒云復幸再歷于名驢主禮尤勤重叨承于盛饌倍

銜厚遇第極鄙情

副使

參陪復命再假歸途方伸取別之情更辱餞行之禮感  
衷彌甚溢幅奚殫

回中京留守攀迎

已畢聘儀復經留甸切荷謙沖之量先形緘翰之光悚  
怍良多情陳莫喻

副使

忝貳使軒已恭修于聘好荐經留府將載邇于風猷荷  
尺牘之先貽銘寸心而不泯

謝觀打球表

騰蹕廣場睹追風之駿足幹旋妙技駭應手之神珠

謝中

竊以義重睦鄰禮優展慶申惠私而加宴肆馳擊以侑  
觴臣等弭節茲時寓觀為幸激懦衷而愈感寫深悃以  
難周

去日回諸州攀迎

修聘鄰封取途治府首煩華翰仰荷勤誠感戢所深布  
宣莫逮

副使

幸叨乘遽獲涉治封敢意謙沖先貽緘翰俯慙無已縷  
述奚殫

去日回諸州請赴筵

暫休馳驛方幸假途特枉榮緘曲形嘉召彌荷勤劬之  
睠尤增悞慙之情

副使

叨陪星使方瀆館人更辱緘題之榮曲垂觴豆之約感慙益甚敷致何窮

回日謝諸州攀迎

茲叱還輶載經會府荷謙勤之見及損翰墨以先貽第切悚銘莫殫剖述

副使

忝參復命載飭還轅先沐枉書尤欽厚意在深衷而彌

感非累幅之可陳

回日謝諸州請赴筵

趣還上國復過名城辱竿牘之見貽具壺觴而為召深  
銜禮遇曷罄指陳

副使

幸參迴節荐歷名疆既蒙授館之勤仍沐壺觴之召不  
勝愧荷無以喻云

進奉郊裡羅

右臣伏以聖神繼王重反始于祖宗禋祀肇修大推尊  
于穹昊盛矣園丘之事驩然萬國之心包茅並馳琛賁  
文獻見夷夏懷仁之至誠邦朝濟治之隆臣忝守封疆  
阻承鹵簿不獲駿奔于大禮第唯想望于清光貢物有  
常敢踰任土之制充庭甚薄深懼黷君之誅前件羅差  
教練使某乙管押上進臣無任瞻天望聖激切屏營之  
至謹進

上廣西漕章少卿



右某言念自違恩庇日企德輝悵道里之甚遼拜旌麾而莫及頃濫遷于省局嘗馳謝于郵筒竊惟懇款之深仰被聰明之照恭以運使少卿量含宏厚識際淵源久著正人之聲獨高舊德之萃播紳慕其格度當宸器其材猷連捧芝函之榮兩司桂管之重雖朝廷之意欲惠于遠方然廊廟之資尚淹于大用佇聞不次之命以塞至公之評某夙冒獎知尤增瞻頌伏望上為邦社精調寢興無任激切依歸之至

上鄭內翰啓

右某伏審拜命上前擁麾方面中外之望猶為赫然東  
南之情不勝幸甚仰惟鎮撫之始福禧以凝恭以某官  
稟粹天元游心聖奧以伊臯任已之重以堯舜致君之  
明風迹高于本朝聲華映于近古潤色大業方繁鴻筆  
之攄頒條巨邦俄便安輿之奉雖承宣遠副于當宁而  
膏澤尚拘于一方未諧當軸之權終蔚薦紳之望顧惟  
鄙樸尤頌高明附風雲之程嘗叨于曩日遠珪璧之度

已涉于積年欣聞桑梓之間獲被埏鎔之造第悵糜軀  
于職局莫由齎謁于門關拳拳有誠縷縷難罄伏望上  
為倚注精調寢興

上章少卿罷廣西漕

右某伏審解印南方擁麾北闕暨休經畫之慮即戒川  
途之程仰惟衝冒之間福休以相恭以某官秉心純正  
涉道精深識通幾微政有根本材猷久服于羣口風迹  
著聞于九重黽勉數年振嶺表列城之敝奔趨三節副

朝端前席之詢行膺不次之恩聊塞至公之論某夙叨  
獎遇尤切瞻頌屬官局之有拘望車塵而莫及伏望上  
為眷倚精調寢興

上河陽富相公

代浙漕  
段大卿

某言念久違鈞庇日企台光悵外計之所拘拜高牙而  
莫及伏惟鎮撫多暇福休荐臻恭以某官與國輝光為  
時間傑心游仁義之粹學際天人之交發策決科經綸  
夙著出疆專對荒曠久寧非堯舜不陳于君以稷契自

任于已志已充于功業望益重于老成勤勞邦家被三朝之注意出入將相聳四海之具瞻握樞輟謀畫之煩擁節遂優閒之請雖清衷加厚徇所欲于勲賢然輿論難平願復還于鈞軸某素叨獎顧尤極頌言伏望上副倚毗精調寢味

上集賢曾相公

右某言念踐封上瀆惕愚慮以方深教訓下頒仰台光而如近迹繫外臺之役心馳東閣之榮伏惟變理多餘

神明來相恭以某官術高經濟道著將明柱石三朝著  
龜萬化謀謨入告自比伊夔之誠勲業大凝遠逾房杜  
之器贊盈成于無逸避譽聞于不居增重太平之風優  
游賢相之體四方莫枕莫非偃草之從百辟具瞻悉荷  
秉鈞之庇某衰遲晚節龜勉東州獲逃漕輓之愆盡出  
埏鎔之賜在持身而愈篤于頌德以益深伏望上為邦  
家精調寢饋

上省主韓端明狀

靡軀漕局曠迹計庭望德滋深與時浸永方貢成而未  
幾遽拜教于不圖榮慰雖多踴瞻愈切伏惟經畫餘暇  
福休迭來恭以某官識洞淵源器函方格奮身胄族之  
貴平步鼎科之雄公忠久荷于倚毗材術累更于踐歷  
剴煩曩日肅天邑之浩穰任重此時瞻邦財之用調未  
遂鈞衡之用尚淹廊廟之資而某夙被獎知日蒙庇賴  
既貫行于戒命且善頌于聰明願觀當軸之榮躋以快  
輿情之竊議伏望上為邦社精調寢興

上兩省以上起居問候狀

職局轉輸奔馳列郡歲時遷變遠高閎雖久曠于貢  
音固不怠于慕德伏惟氣體養正神明降休恭以某官  
器等珪璋量包淵藪秉赤心而內固歷華貫以荐更廊  
廟未登尚抑謀猷之遠冕旒載眷佇聞委寄之優伏望  
為國自將副人善禱

上知郡錢少卿

某不競舍田即學竊玷仕版既朴無他長每自顧以義



而不敢苟于進取故衮衮微官勉力以資祿養者幾二  
十年名聲不能動人氣力不足立事仰思古之豪偉魁  
磊之士唯愧恨其不及而所不作者所守未嘗違所學  
耳曩者次補遠邑易地茲土既至之始乘圯敝紛揉之  
餘鷄鳴而起孳孳從事日赴于庭者不啻蟻聚烏合之  
衆而習俗輕悍人人爭勝相軋以錙銖毫髮為校而求  
其所以平參以筦庫犇走簿書期會聚于叢然雖極力  
以為之常懼材智淺鈍不勝其任而絀吏議故僣勉區

處不遑少安惟是晨昏定省之外他皆所不暇也若其  
江山清曠之興歲時遊從之樂不知為何等事官況至  
此良為未愜乃所幸者冒執事照庇之賜異于等倫庶  
幾猶可為也苟或不然則引去也久矣仰託恩力如是  
其肯作慢以取威怒于不測乎雖牧鬼菟子之愚亦知  
其不可為也且某獨何心而為之乎某前日以虧利之  
咎輒勤有司此不職之所宜得在著令之文明如秋陽  
而不可掩雖子弟不能覬幸于父兄之手也其名為罰

其理不足以辱則心無所動也以其不能覲幸則憾無所從起也于無動無憾之間而返加橫逆于承檄之人是足為狂疾人也然則何歟蓋若人舊役于縣累有宿愆逋責久挂官籍慙于煩浼聽覽不敢數數申請乘其來之便遂令了一名件此犯情尤不良亦祇畧與訖竟不圖興訴以干階屏今日捧受使檄乃知緣此追逮吏輩震恐慙慙汗流及趾不肖之迹不能遠嫌于未然其被罪也固不敢逃唯蘄高明委曲垂恕而亮其踈拙而

無他心不謂不知厚德之及而疎絕之則幸甚

上省判皮郎中

右某伏審光膺詔檢榮贊計庭伏惟慶慰恭以某官學窮根本識照幾微聲華一時風采羣彥蚤更器使之重密簡上知之明北道宣勤贍兵儲于不日中朝遴選佐國用于復來豈唯積勞竭慮而致財賦之饒將見高翔闊步而攄醞藉之廣某嘗叨獎遇尤極頌瞻悵職局之所縻走門闌而莫及下情無任欣抃之至謹具狀起居

陳賀

上胡善馮學士

右某言念自違恩闕日企德輝悵道里之阻長貢款誠而稀闕伏惟道諭之暇神明其休恭以某官沙道粹深處躬夷亮著龜萬變標矩一時智謀淵淵贊計庭之財賦風迹凜凜肅天邑之典型雅協宸衷之至貴還王府之佐至誠以固居有可尊之名清議所歸佇膺不次之用某夙叨獎遇尤極頌瞻聽諄誨而未涯馳鄙心而彌

切

上發運皮度支

右某伏以抱非常之略微劇任不足見其所施對有為之時唯鉅賢乃可分其所寄材與世而相會義兼命以不違亦振古之所難逢在吾儒而為盛事若簪紱傾風之衆馳慶爭先而門闌荷德之生致誠獨後豈自貽于譴絕蓋久困于拘攣少平恐懼之衷輒恃高明之度仰惟經畫餘裕福休在躬恭以某官氣稟純和量函方厚

術學堅正智謀博通應事變以無窮適時宜而有要作  
清平之重器奮夷亮之大心未涉四鄰之榮暫顯六路  
之計風力揚于朝右事權半于寰中無愧古人真得壯  
行之志實繁輿議尚淹入告之猷某頃冒獎知復叨庇  
育銘誨言而歷歷向恩義以拳拳何日望塵得伸却掃  
之禮惟時欽頌固有戀軒之情伏望上副倚毗精調寢  
膳

賀陳院鄧舍人

右某伏審光奉恩俞榮顯制命正人翔步多士驩心顧  
惟門下之生少慰胷中之望恭以某官學行自信德性  
素高以純誠結主上之知以博器為衆賢之重勇當言  
責每焚草以慎傳審治官聯惟擇材而密啟方藉英華  
之氣獨承綸綍之裁然侍從雖優豈足盡遠之志儻疑  
丞未拜烏能使輿論之安某竊玷獎知尤深忻頌悵海  
孺之拘迹企台屏以馳情伏祈上為廟朝精調寢饋

賀判監侍講學士



右某伏審光膺詔檢入奉經筵聞風一時交語相慶恭  
惟某官存誠務遠涉道資深術應變以無窮智運才而  
莫敵獻言中禁早悟天心擁節東州力宣君澤重器難  
淹于外補封軺遽促于北歸秘殿論書必盡唐虞之道  
上庠主教益敦鄒魯之風佇聞大任之榮以愜至公之  
議某竊叨顧遇尤劇頌瞻悵跼縮于海瀕阻奔趨于門  
下伏望上為邦社精調寢興

問候陳院鄧舍人

右某自違德庇日企台光帳拘迹于海壖曠馳誠于恩  
闕伏惟草制餘裕對時納休恭以某官器業宏深踐修  
方正學際天人而守之以晦智通事物而應之以虛綽  
有大儒之風儼為多士之望履亨翔步雖榮侍從之班  
兼善存心猶鬱將明之蘊某竊叨顧遇尤劇頌瞻願觀  
大任之陞蚤慰輿言之切伏祈上副睠倚精調寢興

問候江東運使職方

右某言念久遠恩閱日欽德表阻道途之綿邈貢音繹

以濶踈仰恃高明之有容庶幾愆責之可逭伏惟按歷  
多暇福休並臻恭以某官器業宏深材謀超邁累膺使  
指之重夙被宸衷之知移節江東雖慰一方之望納忠  
朝右尚稽三接之榮某素荷愛存倍深祝頌伏望上副  
睠倚精調寢興

賀前淮漕俞學士移命

右某伏審光奉詔書榮趨魏闕屬拘官之有守望行旃  
以無緣戀德益多馳誠莫究恭以某官材謀超遠器業

宏深智應變以不窮學逢原而自得久聳仕途之望早  
參公府之華上簡宸衷特預書林之選出膺使指暫分  
淮甸之憂撫疲瘵以方寧廣咨詢而未足召節遽至興  
情若為然近用非宜固也速吁俞之命而對揚不晚庶  
乎恢膏澤之資某竊荷獎知尤增瞻慕願為邦社善調  
寢興

賀杭州知府待制沈興宗

右某伏審光膺飛詔雄領便藩豈唯耀閭里之觀誠足

慰東南之望一時清議交口均驩伏惟坐鎮雍容納休  
駢萃恭以某官材猷超遠德誼高深學見于行智酬于  
變奮迹忠嘉之道致身侍從之榮撫育全吳雖朝廷之  
優寄贊承密席在器業以尚淹某久遠輝光倍增瞻仰  
悵靡軀于簿領阻伏謁于門關日對訟棠益想端人之  
表心馳恭梓聊輸不肖之誠伏望上副倚毗精調寢味  
問候發運張職方

右某言念久遠輝光日增嚮仰再叨庇育中竊忻愉但

拘烟海之瀕難走旌麾之下在愚誠莫能少貢蓋音驛  
不敢僭馳豈自絕于賢門肯輒忘于禮遇仰祈明廓之  
鑒委照叢微之衷伏惟經畫多餘福休兼萃恭以某官  
器鍾間異材蘊將明學逢自得之源智應無窮之變累  
膺邦寄早結主知未涉四隣之榮暫顯六路之計風力  
盛揚于朝右事權幾半于寰中何愧古人真得壯行之  
志實繁輿議尚淹入告之猷某未遂望塵第深頌德謹  
緣一介之便聊獻積年之情伏冀上副倚毗精調寢饋

謝前海門徐主簿

右某久濶緒言積瞻思而無算向緣同事忻際遇之有  
涯旋審見星之行遂虛披霧之願弦朔易改音郵莫傳  
幸单介之遽來荷尺書之遠及伏望俯就禮制載安寢  
興宿學周才難久淹于栖隱修途清貫行仰聽于飛翔  
會晤尚賒保調是請

賀冬

右某伏以剝往復來物心將泰陰消陽長賢履所宜恭

惟某官告德在躬純誠應物遭此令辰之會納諸繁社  
之休某跼縮窮深縈靡職守第望風而申禱圖拜壽以  
無緣

滁倅到任謝監司

右某伏奉勅差前件差遣已于今月十八日到任訖非  
材佐郡方虔視事之初高位鈞仁固識托庥之幸恭惟  
某官聰明坐照德誼內充表儀羣吏之端振舉百城之  
治某乍顯職守仰奉聲輝未能聽教于門闌第用馳誠



于音驛

滁州陳內翰

比者濫膺宸綬叨贊郡條方依德之有涯竊省躬而自  
慰恭惟知府內翰性鍾間異道涉淵源以嘉謨直節而  
結上主之知以碩學鉅材而聳時賢之望踐玉堂之清  
近更天府之浩穰偶鎮偏封坐極承宣之效佇迎大任  
行攄經濟之猷某景嚮積年叅陪有日預忻披霧將仰  
于台光先謹發函輒塵于蒞鑒伏望上為邦社精調寢

興

又

言念近貢牋函方慙于塵冒遽貽誨牘但感仰于謙  
光伏承山國寒微鈴齋甚暇穆若神明之相晏然氣宇  
之和式慰遠瞻且符善頌恭以知府內翰術搤經濟材  
蘊將明外夷險而以道自期忘貴富而以德自任剖符  
暨屈限膏澤于一方趨節佇聞聳儀刑于四海某即奔  
官守漸邇台輝唯祈召拜之少延庶慰傾依之夙望伏

覲為時自壽副下所瞻

賀冬監司

伏以日在北陸陽萌黃宮歲功為布德之初人道重履  
端之始惟時賀慶之禮莫盛賢明之歸恭惟某官器業  
高深忱誠渾厚對令序而順適納純修而獨多坐撫列  
城均致福綏之及佇膺大任倍迎寵數之優某跼守備  
員阻趨為壽遥企門闌之峻徒增祝頌之虔

賀運使韓司勳

伏審光膺詔檢榮領漕權凡冒德庥舉增誠悅恭以運  
使司勲材猷高遠器業宏深蔚有古人之風周知當世  
之務霄岐翔步行膺三接之榮淮甸先聲立致百城之福  
某縻軀職局企踵旌麾未修伏謁之勤姑獻頌瞻之懇

賀提倉李國博

伏審光膺宸詔出按淮邦惟時列城壹意相慶恭以某  
官材深應變器重適時要劇累更聲輝獨盛尚淹高躅  
未慰愜于輿言暫屈遠謀為福休于一道某尸官山郡

引領車塵未伸一拜之勤聊謹寸誠之獻

上本路監司

比者叨被恩俞幸分郡寄將依德庇預慰誠心恭以某  
官器業宏深材猷高邁中外屢更于要職事功綽著于  
昌辰持節東吳雖厚一方之福飛聲上國佇膺三節之  
招某指日戒途之官瀕海望使臺而漸邇伏賓次而有  
期敬遲參承併紓懇款謹先奉狀起居

賀豐待制

右某伏審光奉恩綸榮顯方面列城千里相慶一辭恭  
以某官德望素高學行甚偉以忠謹蚤揚于諫列以剛  
明久貳于卿曹暫離侍從之聯出展藩宣之效睢陽近  
甸頃辭留鑰之崇浙右名邦來統兵鈐之重畫錦旁輝  
于鄉國歌襦翕振于民聲某之官海濱假途節下修桑  
梓之敬匪夕伊朝仰旌戰之嚴既欣且幸先馳緘慶曷  
究款誠謹奉狀賀

賀謝蘇倅

右某伏審及瓜受代解印還臺竊惟慶慰恭以某官性資冲厚術學精深藹然愷悌之聲美矣承宣之助宣勞澤國惠民物而有終奏課宸庭被龍光于不日曾惟衰拙遂失瞻依辱誨翰之先貽在悃誠而深愧即期邂逅以罄叙陳謹奉狀賀兼謝

賀章倅學士

右某伏審涓辰已諧視事竊惟慶慰恭以某官學深造道德粹秉彛冠多士于南宮耀英游于文館露章請外

蚤摠及物之誠明詔發中佇聽急賢之名曾惟衰拙將  
幸瞻依欣慰良深敷陳罔既謹奉狀賀

到任謝監司

右某言念叨奉恩除誤膺郡寄涓辰惟謹始視事以厲  
精冒庇云初竊撫躬而知幸茲馬依仰至矣情誠恭惟  
某官德量淵宏材規高遠副九重之棟擢振二浙之風  
聲持節此方其盡光華之實旌能不日佇躋清近之班  
某尸職海瀕馳心節下未遂參承之願且通悃愾之勤



傾向攸深叙陳罔既謹具狀謝謹狀

賀台州樓朝請

右某竊審涓辰已諧視事伏惟慶慰恭以知郡朝請材  
猷敏劬術學粹深提身固久于中庸莅政獨多于愷悌  
分符海角變為福于斯民趨節日邊佇恩于伊夕曾  
惟哀拙幸邇風聲念馳慶之未遑辱貺音之先及感慙  
彌甚敷諭奚周謹奉狀賀兼謝謹狀

錢塘集卷十